

四庫全書

史部

# 欽定四庫全書

史部

陝西通志卷八十九

詳校官監察御史臣劉湄

檢討臣德生覆勘

總校官降調編修臣倉聖脉

校對官中書臣王家賓

謄錄監生臣姚元開

欽定四庫全書

陝西通志卷八十九

藝文五

賦下

渭水貫都賦

唐衛次公

清渭天鑿名都王制貫金城千里之域瀉銀河九霄之勢同穴發源泉川潛泄分黑水以渺漫遶黃山而迢遞水能濟物用尊於中州君德配天故法於上帝都之會也皇皇渭之流也湯湯異東西之瀍澗非汲引之沮漳

夏后濬川分流非肇於伯禹秦德主水貫都必因於始皇照雙鳳之丹闕架長虹之飛梁褰裳者不勞於揭厲濯纓者何必於滄浪泛彼樓船掩橫汾於武帝濱之鈞叟感入兆於文王且夫前王酌憲惟皇都之所建度地有孚因貫渭之上腴曲抱乎周原秦野旁臨乎八達九衢既流行以紅粟誠輝煥乎黃圖則知八水皆流豈清於渭水五都並制莫大於西都原夫渭者雍之巨浸都者人之所聚天垂法君必取曳雲間之清渭河殊雲漢



移天上之紫宮洞開天府及乎縈流一帶中派紆餘蕩  
元氣澄太虛稽前典而備矣於名川而舍諸豈惟積潤  
於庶物固亦近壯於皇居至乃春景澄廓晴霞朗暢涵  
萬象於影中度牽牛於波上客有觀光者於茲而寫望  
美夫取法可仰因天垂象疏紫陌而逶迤流丹霞而蕩  
漾周公卜洛雖云風雨所交秦后貫都實謂膏腴之壤  
惟洪業之永固與渭流而彌廣

登吳嶽賦

周鍼

吾嘗文戰將北羈遊極西覩吳嶽之孤峭計羣山之莫  
齊由是邈崖谷遂攀躋入雲靄出沈泥既臻頂上用視  
天俛鴈塞殊小峨眉甚低盖以氣壯神扶雄標國祚揖  
白帝兮不見抱皇城而自固嵐光擁翠拓開霄漢之心  
岫色橫空鎖斷東來之路嵒崿旁竦峒窈窕上干碧草春  
含清風夏寒遙瞻魏闕迤立煙巒疑超洞府謂在天壇  
中隱深溪日月之光不到外連層阜龍蛇之勢斯蟠當  
其區宇正寧氛埃初見覽造化之宏制識乾坤之設險

汧水縈盈而線走隴山崩旋而螺掩西窺劒閣霜地表  
之千鐔東瞰蓬萊黛波間之數點遐徵衆嶽式並隆崇  
彼皆受封於百代此獨不視於三公森筍立以削成寧  
慚太華黯雲凝而化出豈讓維嵩况乎萬仞凌虛千里  
倒影虎踞華裔鯨吞遐境壘巘攢壁迴巖列屏捍絕域  
以增隘固中原之堪永直使以禮賓九有仁服八荒臂  
賢以為輔弼宅道以為封疆亦須假我嚴衛憑我巨防  
靜藩垣於都邑遠隔闔於氐羌吾唐重其功崇其鎮爰

升成德之號用補極天之峻小儒是以竟日興感抽毫賦韻登詠畢兮嶽岑指長安而後進

巨靈擘太華賦

關圖

泰華崔嵬伊巨靈兮其壯哉挺高掌以遐舉擘孤峰而洞開功侔造化勢越風雷劃千仞之巖巒屹從地裂決九河之波浪杳自天來昔者混沌是生磅礴惟神無朕配天有作念波流之未通顧茲山之可却將以闢迢遞正嶄鑿愜心而再定川原應手而別開林壑靈異將伸

雄稜益振蓄怒鼎巖注情嶙峋謂釣鼇不足以駭人鞭  
石不足以騁神指揮而疊嶂知改盼睽而三峯可新然  
後攘臂効能端身任力捫蒼藹於天半折翠微於月側  
若百神將萃而潛助二儀欲判而未息嵐光兩向猶連  
松柏之聲黛影中開已斷雲霞之色豈不以閼形幽默  
拓跡巍我致用而扶持天地成功而變化山河分積翠  
於空中千年軋塊啟通津於指下萬里騰波豁丹崖於  
天阻呀峭壁而相距勢且異於兩傷力自弘於一舉截

仙子幽棲之洞壯王者建都之所蓋以神開壽域靈固  
人寰廓峻極於倏忽標削成而險難越大禹之理水小  
愚公之移山竹箭波中路竟深於導達蓮花峯外跡終  
寄於躋攀是知事關杳冥理歸幻奧石有時而分裂水  
有時而疏導信乎載物者之使然非人情之所到

涇渭合流賦

獨孤綬

感異源而合趣指涇渭於秦樹涇如經也自北而南流  
渭若緯焉從西而東注性相近以不息勢使然而自遇

湜湜其汜昔既聞之於詩湯湯其流今則狀之為賦夫  
至清者渭至濁者涇惟清也鑒物之道著惟濁也含垢  
之義形共導金氣咸通井星混殊流之昭晰成一帶之  
滌滄初以縱亂橫似爭長而難雜終以潔受污何極睽  
而乃合禹功之所兩存漢苑斯焉博納乍異其色覺游  
鱗之隱見必同乎聲帶長風之蕭颭象昭回之可求歌  
鄭白之有由飲馬投錢足以發明廉士決渠降雨足以  
殷富神州既相弘以利物寧自異乎並流知之者齊我

以不皦不昧感之者比我於一薰一蕕斯乃柔以長存  
和之足貴近則順洪河之紆直遠則成滄海之濩渭同  
功一體叶靈通氣信殊穀洛之流寧與淄澠之味夫然  
波獨清而無偶非達識之所謂

御註孝經臺賦

張晉

孝惟行先教實理本故玄宗探宣尼之旨為聖理之閫  
爰索隱以鈎深或詞約而意遠然後勒睿旨於他山之  
石樹崇臺為儒林之苑天文煥發知孝道之克宣微旨



高懸示仁風之已返上崇君德下達人情王猷玉潤帝  
典金清誼雖刑於子道理實暢乎家聲施之於人風俗  
可移於孝理懸之於教日月方比於貞明不然何以倬  
爾孤標介然守正金字累累以條貫銀鈎歷歷而交映  
故嚮之者修睦就之者起敬斯乃示生民之大端仰高  
山之景行至哉聖化本本元元酌其旨而薄俗可厚毗  
於政而理道可敦故政以肅教為尊非無詩書始務陳  
其行本非無貴賤心願宗其化源且高而不危者尚乎

臺磨而不磷者莫如石揭貞質於庠序殊秘府之竹帛  
諒乃侔天地而始終豈特垂載祀於千百靜而繹思文  
固在茲一人有作比屋允釐覽君君臣臣之間則心乎  
愛矣於尊尊卑卑之道則學而知之矧乎雕琢成章區  
分式序方隅而不失其正篇次而各得其所三千子之  
鼓篋邈矣具瞻十八章之箴規揭之備舉乃知孝理馨  
香有時而彰不壞不朽化被無疆所以播鴻休於玉葉  
表嗣子於明王故曰孝者天之經也宜乎配地久而天

長

駕幸九成宮賦

李子卿

皇帝握靈符之三載也天地穆清星日耀潤野訪遺逸  
朝登傑雋化則垂拱而成令則不言而信時巡之儀展  
秋獮之禮順思訪俗而觀人若乘乾而出震右輔伊邇  
離宮在茲前瞻鳴鳳之岫傍指神鷄之祠渭水烟波接  
苑中之洲渚岐山雲物落禁裏之軒墀俄而迴鑾輅載  
羽旗為宴鎬之樂動橫汾之詞况不勞於百姓而有務

於三時者哉由是叶清秋揀吉日乘石洗皇輿出七駟  
按隊千乘扈蹕戈矛林森士馬擲比始地業而天旋終  
電馳而飈疾翻然而八駿蹇騰霍濩而六龍奔逸雷公  
轉轂風伯按馭朱旗列而秋野生春金甲照而暮川增  
曙陋漢帝之遊行哂秦皇之逸豫祥煙不散近飛槍壘  
之間瑞草常開併拂車宮之處廣陌鳴鑾異彼遊盤訪  
百年之疾苦知五稼之艱難成王之蒐由是問古公之  
政有以觀翠華來兮野老喜屬車至兮國人歡詎比夫

隴塞回中妄開行幸之路泰郊時上虛立禮神之壇穆  
然深宮駐蹕其中樓枕嶺而倒影殿當川而抱虹閣邃  
而寒暑隔宮堯而雲霧通前視八水傍臨九峻所以明  
四目達四聰凝睿想播元風比遊心於汗漫侔得道於  
崆峒亦既下輦於是端冕補闕政修墜典大風之歌作  
湛露之恩展於是振旅建旄迴鑾返轡百蠻懼威武萬  
姓知教義若臣者巖穴久服丘園來貢未有燭於皇明  
竊以覩於人瑞敢獻揚雄之賦庶獲有司之議

按地業  
宜作地

山

三良塚賦

并序

劉禹錫

魯文公六年秦伯任好卒以子車氏之三子奄息仲  
行鍼虎為殉皆秦之良也國人哀之為之賦黃鳥君  
子曰秦伯之不為盟主也宜哉先王違世猶貽之法  
而况奪之善人乎是以知秦之不復東征也秋季月  
吾西遊汧渭出於岐雍之間於古道傍得三良塚心  
甚哀之涕泗者久之而去詞曰

昨宿岐城曉涉渭東霜凌雪結飛沙亂蓬中野躊躇局  
此古墟野人曰即車氏之塚方驅駕班如久而咤曰吾  
嘗讀舊史矣古者秦氏大於穆公出師則寧東夏用賢  
則霸西戎大邦服其禮小邦畏其雄謀已集戰亦武不  
能勤王不為盟主者何居以滅天之良喪人之特百夫  
仰系一朝而蹈可哀也哉宛其三子遭時迭遘主已即  
世身皆靡全指冥冥而為期撫昭世而坐捐方惴惴以  
臨穴且哀哀而號天從有言於寒原莽蕩千里迴眺無

垠上刺衰德下傷幽魂挂驂隴樹脫劍山門掇野芳以  
為薦汲行潦而充罇矧今情之猶悲諒古恨之潛吞死  
而不作吾誰與言代事浩渺人壽爾天言念君子中心  
悄悄哀生人之長慟赴永夕之莫曉歸去來兮不可留  
且悲吟於黃鳥

華清宮望幸賦

李程

上苑之左兮驪山之中天作高岫帝為離宮示宸遊之  
有所表聖鑒於無窮臨峻路而赫其眈眈標爽塏而屹



以崇崇惜翠華之未至閔紫殿而猶空則有望幸其中  
流睇延幕希天顏而迴矚望雲闕而屢顧想息波之東  
注俯瞰渭流愛佳氣之西浮空瞻秦樹目盡煙末心馳  
御路何聖慮之未還獨幽懷而能喻窮轍跡且俟玉山  
之遊想車音將購長門之賦矧夫閭有朝元之美稱殿  
有長生之嘉名霞駁丹檻雲攢繡楹可以召通仙之降  
止安皇祥之永貞是以仰碧空竭丹誠庶日月之迴照  
等葵藿而同傾濯甌沸之泉每想金輿之度踐萋青之

草還思玉輦之行雖託質於別館常寄心於穆清戀戀  
西向悠悠矚望步磴道以寂歷眄廣庭以寥曠竹花雖  
吐如含待鳳之誠雲氣纔升若覩從龍之狀彼玉山既  
遠金闕仍賒未若浮遊近縣如在仙家俄天邑之孔邇  
自神都而不遐雖館稱五柝殿美九華諭之於此曾何  
以加惜乎神光未矚曠此佳境徒企想以忡忡復懷慕  
而耿耿閉玉樹於深谷銷金鋪於秀嶺君乎君乎胡不  
出宸居而來幸

華山為城賦

陳諷

地控強秦路惟分陝有太華之作固若崇墉之生險絕  
壑中抱重巒外掩倚雲漢而匝野屏開跨金方而當空  
黛染千尋壁立萬雉雲屯龍盤日月虎視乾坤大河自  
北而東呀為濬洫窮谷從中而斷豁若重門誠百二之  
光宅見九五之天尊偉夫襟帶皇都咽喉上國磅礴乎  
嶠函之外隱軫乎豐鎬之側所以羅羣象吞八極展萬  
祀而成在衆心冠三秦而位居一德况乎天地初霽雲

霞四披紅塵滅影碧落標奇宿霧市之氣尚疑烟闕聳  
蓮峯之色不讓丈陴顧萬夫之莫向信六國而奚為岌  
岌神才言言天設連岸抱九州之路壯氣折諸侯之節  
蕭蕭歸馬想飲窟之初還隱隱輕雷訝鳴鼓之不歇天  
包地束鳥過雲輕萬仞垂峭千峯入冥髣髴虹蜺盡識  
旌旗之色依稀星月皆分弧矢之形疑其發跡混茫孕  
茲重阻假巨靈拔山之力衛王者登龍之所不然安得  
不費一錢不勤一旅削成而千里共峻作鎮而一人可

禦是宜堯為君而舜為臣道為主而德為隣與天地之人共守使海內之士咸賓

潼關賦

張翌

惟皇王之建國分中外於上京憑山河以作固闕華夷而騰聲誠曰咽喉吞八荒而則大是稱巖險控萬國以來平周有掌貨之節禮無關門之征巨防宵扃倚洪波而作鎮重扉擊柝連太華而為城荆中代之新號變函谷之舊名柱史老聃擁仙雲而西邁終軍童子建使節

而東行文仲不仁廢六關而興誚王元有說封一丸而  
永清若用備不虞取諸繫象作邦畿之襟帶杜奸宄之  
來往長墉矗兮雲屯層樓赫以霞敞登臨者皆知其地  
雄踰越者無漏於天網亦有孟嘗奔走長宵未曙何白  
馬之不談學雞鳴而乃去逢尉臣之一失或愚者之千  
慮至如楚漢爭雄沛公先入旗鼓照耀兵戈翕習南面  
則三傑齊驅東井則五星俱集實靈命之所應亦人謀而  
是及王道廓而已清帝業巍乎乃立窮四塞之艱阻成

百王之都邑故知建功定霸期乎此關武侯矜於固險  
婁敬說乎河山視前列之軌躅覽陳跡而躋攀既登高  
而能賦希駟馬以言還

武關賦

王啟

路入商山中橫武關呀重門於固護屹峭壁以孱顏昔  
在危時屯千夫而莫守今當聖日置一卒以常閒觀乎  
地勢爭雄山形互對西連蜀漢之險北接崤函之塞世  
亂則阨限區宇時清則通流外內當其六國連謀關防

日修則斯地也雲屯龍武雪耀戈矛張儀出以行詐懷  
王入而竟留縱下客之鷄鳴將開莫可任公孫之馬白  
欲度無由及乎塵起九州波搖四海秦鹿失而襟帶難  
保漢龍興而山河遽改豈料禦衝之所此日全平未知  
擊柝之徒當時安在所謂以兵而備者莫之能守以道  
而居者莫得而踰千里之金城湯池終為漢有二世之  
土崩魚爛自是秦無今則要害何虞平隆已久雖設險  
以猶在顧戒嚴而則否蕭條古壘豈臧文之廢來寂寞



空扉似楊僕之移後蓋以文修武偃國秦時雍濬四溟  
而作塹廓八極以為墉遂使鞀鼓無喧一水之寒聲決  
決旌旗常卷千載之暮色重重嗟乎昔為洪樞今成隙  
地信無外以斯見實善閑之攸致儒有經其所感其事  
乃曰今朝西去豈無隨老氏之人他日東還誰是識終  
軍之吏

西都賦

李庚

洛汭先生客於上京問里人以秦漢咸陽故事里人曰

先生不習乎哉秦址薪矣漢址蕪矣西去一舍鞠為墟  
矣代遠時移作新都矣先生曰賓者不識藐然老沈慙  
歲亡而日遠願聞古而知今為我源說恭承玉音里人  
曰昔者帝兆唐居命隋先基乃假隋權是開中原既權  
二年為唐遷都周榛秦莽平蕪枿餘文驅煬迎卒於侑  
傳若天使項氏死勞而授漢休也唐開禮壇新都之門  
闕殿乾宮以朝諸侯時則有若房魏作弼英鄂執律南  
陽故人河間帝室戎衣既脫瑞氣洋溢謹聲傳於億兆

煬燎致乎太乙乃會漢酺發周賚謚萬類渟四海遂開  
國以報功差子男之五等然後構閣圖形榮號凌煙指  
河帶以山礪書天子之縉紳其制度也擁乾體正坤儀  
平兩曜據北辰斥咸陽而會龍首右社稷而左宗廟宣  
達周衢址以十二棊張府寺局以百吏環以文昌二十  
四署六部提統按星分度儼憲臺而四列肅陰宮於北  
戶建倍員於前王總網維於御史端國儀朝實周察乎  
左右其內則有太極承端通址含元日出東榮月沉西

軒倚九峻之下麓涵太液之清瀾龍道雙迴鳳門五開  
煙籠凝碧風靜蓬萊東則左閣當辰延英耽耽宣徽洞  
達溫室隅南接以重離繇乎少陽是為二宮複道邃廊  
西則月華重啓銀臺內向中書在焉密用宰相宦者別  
省延緣右藏建子亭於屏外設蘭綺於廡下天子端朝  
明庭九賓發少府之冕旒陳奉常之官勲肅勾陳以辟  
護翼雉扇而對分鷄人乃下鳴鶴先聞千官就日萬品  
趨雲漏遲遲而東轉風習習而南薰外則國子招徒疏

館開軒左立太學前惇廣文膳豐中厨就教九年稽以  
博士總之成均秘書典籍品命校郎橫閣三重闡正鉛  
黃若六藝之條貫百氏之縱橫交錯發論禮形而樂聲  
太傳在前少傳在後載言載筆出納謨誥鵷動鸞飛振  
玉鏘金殷廟羞瑚璉之器楚材產杞梓之林已而變和  
陰陽經緯天地採撫軒昊牢籠虞夏闢孔子之學堂敷  
一代之風雅此王者之文教也親兵百萬制以神策紫  
身豹首金腰火額獵霞張旆剝犀綴革奮目而虎眈振

須而蝟磔柔六鈞貫七札對天仗以司戈分玉墀而執  
戟別有陳旌賜鉞閫外四七依榆關以作鎮距柳營而  
開壁逐寇則出塞飛塵伐叛則救陽作澤此王者之武  
威也唐禮既行三代同風徵叔孫之春官命伯夷之秩  
宗則有封禪巡狩謁天拜祖明堂辟雍王者之事有司  
勿失次有朝廷之位班爵之序器服車馬以節文武不  
僭不濫群臣之事有司以告下有內族外姻以殺以隆  
五禮各殊陳吉儀凶一室是形天下大同百姓之事有

司以教故以內則敬以外則嚴以家則肥以國則昌卿  
士翼翼公侯皇皇在野熙熙在朝蹌蹌夫如是夸周而  
正魯胡可殫詳洎乎樂之設也以德配樂陳器以作革  
木匏竹簋簠磬鍾命官二署諧以協律以奏廟貌祖考  
來格以陳宮庭簫韶九成鳳凰來儀以布天下手之舞  
之足之蹈之及乎御引衣集舞童或獻凱作名以宣帝  
功或布字綴行以達皇風此禮經之所未紀變夏之所  
不同刑期無刑以辟止辟三章寘漢祖之德四赦緩穆

王之法於是天子御端門詔天下渙汗發澤與民更始  
建金雞於仗內聳修竿而揭起其下則稅三關解銀鑄  
追共工徒驩兜煦舜紘浹堯年臺收白簡吏閣丹筆總  
秋官之計料不踰乎三十斥匡衡之失論罪溫舒之不  
足司寇無鬼哭之庭大理有烏巢之獄又若薦祖建宮  
元元之庭霞披雲冠飄飄太清天子將有事也歲豆時  
籩夏簋殷銅傳金爐之御煙開甲帳之琳琅此王者之  
示孝也對里連街帝宅王家青門列檻棠棣分華勤政



外名花萼中題屹雲中而佩鳳香天外而舒蛻於是天子設席千羞百醴家人齒筵愉愉濟濟此王者之示悌也盛則長隄砥平錯則纓弁繁夥佩印分魚九叅六佐肅威儀於行蓋指戒途於前馬待漏未開朝騎沓街雞鳴朱邱火度青槐先導擘雲後車奮雷逋以嚴聲不生微埃人寒物慄統以京尹臨人秉殺罔敢不謹豪家戚里金張許史走騎如雲行車若水拉枯請命曾不仰視配前王與後趙固異代而殊擬其地勢也負秦章臺倚

漢甘泉帶涇渭之富流挾終南之壽山指重城之二華  
拓外門於兩關元素交川灞漚在焉斷虹偃蹇而亘梁  
拖輪走驟而蹄奔度萬國以向朝趨魏闕之通門赤縣  
統劇停阡帝鄉長安萬年乾封明堂藍田左倚鄠杜前  
張分圻連乎馮翊畫郊接乎岐陽排吳山而抵蜀亘氐  
谷而通商天子穆清環衛陳兵將軍之號三番六營至  
乃辨曉警昏主在金吾鼓列六條外傳通衢備以嚴兵  
羅以周廬禁動息人用戒不虞其中則御水分溝昆明

下流在野決溉入宮環洲菰織蒲紉芰贅菱羞渚戲玄  
鷗沙眠白鷗其遠也深有蛟潭派作龍湫溪接河漢波  
通女牛其近也方塘含春曲沼澄秋戶閉煙浦家藏畫  
舟爾乃農家東作厥土黃壤樹以桑柘翳薈乎南畝以  
杭以稔以黍以稷以輸太倉天子之儲土厚地中溫寒  
以宜門多杖老室有蕃兒承化發謠帝力不知則有程  
鄭之家白闥朱軒崇基峻砌侍駟高門木秀茸葩紅舒  
綠繁挺碩果於華林育豐蔬於中園珠箔畫晴金缸夜

明羅繡巾幘鼓瑟吹笙譁族陳賓以樂乎太平貨隧分  
廛物次駢連中署肆師夕咽朝昏越璞楚琛蜀賄巴賁  
裁綺張繡紋軸蕉桐聲教之所被車書之所通交錯雜  
沓斯焉會同黃宅緇廬金篆玉局以張帝居用壯天庭  
千形萬聲不可多名天子奉堯舜之道勤后稷之功當  
仲夏而獻蘭立中和而視農然後黼黻時備采盛告豐  
其接下也則堯鼓不懸晉木不列鎔金作軌四門是揭  
人靡迷邦土無諱訐示收材而問青上諫行而寃達當

其萬國貢珍四夷納賁賦用舟通財因輦進地官計國  
度支主吝百姓既足斯焉充牣復若天府萬品以備供  
職登饌則光祿獻厨命駕則太僕承軾其樂人也大啓  
九重分開三殿齒羣臣於坐次徵公族於內宴於以訓  
恭儉於以示慈惠戲族咸在百弄迭改視仙童之霓裳  
覩壯夫之角觝御階晝陰帝座春生繽紛宮闈窈窕嬪  
林既受賜於逮昏盡拜帛而懷金與衆之樂一日於此  
先生獨不習乎其四郊也故有乘時之舊址亡國之遺

蹤天子迎四氣盡然改容曰是足以懷傷於耳目作戒  
於心胸且秦政肆刑秦民共傾楚澤大呼分隲列城徒  
罷驪山役休上林秦址既遷鴻門至今此東郊之事也  
隋苑廣袤置籠南山占地萬頃不為人間齊門失耕禽  
遊獸閒代謝物移繚垣不完此南郊之事也豐水悠悠  
文王作周傳艱子孫衰平遂遷乃睠鎬都武王宅居國  
失報遜豐鎬皆無此西郊之事也漢設五畤以主淫祀  
樂誑徐誣將求永久天子親拜太牢泰牡事亡地存為

天下笑此北郊之事也故因迎春則鑒秦敗知恃刑不如恃德也因迎夏則鑒隋怠知獵獸不如獵賢也因迎秋則鑒周勤知祖基作艱傳萬年也因迎冬則鑒漢誤知去淫即正獲天祚也四鑒已陳澤於生人四德已懋格於上下故我高祖一呼大定安都居正傳今皇帝一十四聖是知禪國也禪都也非得隋之命是得天之命

阿房宮賦

杜牧

六王畢四海一蜀山兀阿房出覆壓三百餘里隔離天

日驪山北構而西折直走咸陽二川溶溶流入宮牆五  
步一樓十步一閣廊腰縵迴簷牙高啄各抱地勢鉤心  
闕角盤盤焉囷囷焉蜂房水渦矗不知其幾千萬落長  
橋臥波未雲何龍複道行空不霽何虹高低冥迷不知  
西東歌臺暖響春光融融舞殿冷袖風雨淒淒一日之  
內一宮之間而氣候不齊妃嬪媵嬙王子皇孫辭樓下  
殿輦來於秦朝歌夜絃為秦宮人明星熒熒開粧鏡也  
綠雲擾擾梳曉鬟也渭流漲膩棄脂水也烟斜霧橫焚



椒蘭也雷霆乍驚宮車過也轆轤遠聽杳不知其所之也一肌一容盡態極妍縵立遠視而望幸焉有不得見者三十六年燕趙之收藏韓魏之經營齊楚之精英幾世幾年取掠其人倚疊如山一旦不能有輸來其間鼎鐺玉石金塊珠礫棄擲邈迤秦人視之亦不甚惜嗟乎一人之心千萬人之心也秦愛紛奢人亦念其家奈何取之盡錙銖用之如泥沙使負棟之柱多於南畝之農夫架梁之椽多於機上之工女釘頭磷磷多於在庾之

粟粒瓦縫參差多於周身之帛縷直闌橫檻多於九土之城郭管絃嘔啞多於市人之言語使天下之人不敢言而敢怒獨夫之心日益驕固戍卒叫函谷舉楚人一炬可憐焦土嗚呼滅六國者六國也非秦也族秦者秦也非天下也嗟夫使六國各愛其人則足以拒秦秦復愛六國之人則邇二世可至萬世而為君誰得而族滅也秦人不暇自哀而後人哀之而不鑑之亦使後人而復哀後人也

集靈臺賦

張良器

希夷乎人皇居明堂闢陰開陽冠通天兮蔭華蓋發大  
號兮流耿光將樂瑤池之宴集由喜玉京於壽昌降清  
問於宣室討真經於柏梁乃因高為臺順時謀築披翳  
薈剪林麓鏟重岡移峻谷量其遠近以議夫土功命彼  
般倕再度其山水使人以悅無告於勞均力取材不遠  
而復屹九重以初起憑一簣而始覆其為勢也峨峨皚  
皚粉壁光兮朱門開若方丈興蓬萊其為麗也崢嶸郁

煜星柱浮兮雲楣肅狀靈光與景福有時鳴猿告曉貞  
松歛靄千峰轉日迎秀色於瓊樓萬歲傳聲和幽音於  
地籟磅礴壓乎人境抱芳華乎天外王喬飛舄見鳬影  
之翩翩神女窺窻聽鸞歌之噦噦俯衆山兮如束縈八  
川兮如帶上方向晦宴息齋心防戒乘金根駟玉軼夸  
父秉鉞蚩尤揚旆鐵衣沸渭以焜煌寶馬騰驤而沛艾  
環鈎陳而列武士震砰訇兮軼埃塏登夫集靈之臺謂  
天帝而為會奏無聲之樂寂寞而難分展無體之禮質

素而無文睟容綽約元化氤氲聖主湛恩散作八方之  
雨清都喜氣凝為五色之雲彼昇龍鑄鼎之后捧盤承  
露之君徒髣象於前載孰能成乎此勛然大造之德曰  
生大君之位曰寶未有離於兆庶而謂之至道願獻華  
封之壽上祝唐堯之盛股肱為良元首作聖用壯辟雍  
之美乃經靈臺之政豈必沐咸池陵倒景脫屣乎寓縣  
棲真乎絕嶺屆中天之峻極從化人兮習靜然後屆無  
何之鄉去有為之境者也於是情冥其懿德貴惟恒可

大可久不騫不崩動植風靡雍熙日弘宜其四溟式晏而人和年豐

望春宮賦

闕名

青門之左兮層宮嶙峋資睿覽以臨下得嘉名於望春故在東以就乎陽位當出震必俟於良辰乃發惠和式遵夫月令無勞轍跡自表於時巡其初也度弘規法大壯標上苑而獨出儼複道而明望遠天聽以遂於群生浹皇情用交乎四暢解飈微扇籠輕靄於高臺淑氣初

臨鑠浮光於絳仗吾君於是縱目前檻馳神遠郊散晴  
煙於地表拂佳氣於林梢觀青陽之煦然載懷祈穀聽  
鷓鴣之鳴矣不使覆巢布政有孚宸遊是假察微明於  
遠嶠睇新綠於平野南山之翠色盈前渭水之素光在  
下蓋將賦籍田於晉代豈比撰吉月於周雅美矣哉  
雲楣以重疊煥藻井以輝潤居高而遠無不臨涵澤而  
動無不順諒可裨於恭默非取樂於崇峻况乎流鶯欲  
嘯初柳生姿懿祥風之習習增麗日之遲遲偉鳳闕之

樓臺萬邦仰止  
眇龍鱗之原隰  
五稼惟時聖上所以成  
化用彰克勤是務  
元功所以遐及仁術  
紛其大布斯宮  
寧忝後之為斯望  
匪盤遊之故既而  
天地叶神人和修  
文以昭士耀武以  
止戈然則賦望春  
之事宜乎播大雅  
而登歌

重修周公廟賦

并序

宋 王嚴

元祐元年春三月  
皇帝嗣位肆大眚  
以新天下詔書  
之下郡縣者有曰  
前世聖帝明王忠  
賢哲義有大功



利及物列於祀典其陵寢廟貌廢缺不完者悉令葺治所以竭虔妥靈格於上下稽若古訓敦厚風俗其意甚美當是之時有司固當增置然制度狹陋草率苟完不足以奉承朝廷尊大先古聖賢之意今陝西轉運使游公元祐六年按行西路飭官吏畀財用大為營建凡一百一十間又因其泉流導之者為畎澮瀦之者為池沼植之者為園林培之者為亭榭森布概列落落如畫圖間使人喜遊而肆觀焉至其廟貌

尊嚴殿廡華煥左右仗衛塑畫羅列劍戟森然絳繒  
光耀竦動耳目而聖象巍然居其上髣彿如見當時  
坐明堂被袞衣抱幼君以朝諸侯四方萬里海隅之  
君奔走俯伏聽命莫敢後時制禮作樂七年而致太  
平以成周家卜年卜世之久嗚呼盛哉此亦天下之  
壯觀也惟周公盛德大業具見於詩書而法度文物  
載在周禮及其行事之緒餘往往論辨發于史傳諸  
子百家之書仲尼又以其微意於春秋以深究禮法

之弊此固非淺見諛聞所可道也因拾其已傳之迹而係之以賦曰

粵惟有周肇自履帝后稷不窋憂勤積累公劉基理釐爾士女太王避敵從者如市躬仁蹈義以迨王季文王作則德與民庇小心翼翼天下有二武拯塗炭昧與甲子太白授首商紂妲己梯航四海車書一軌天作元輔曰旦翊世文王之子武王之弟武疾未瘳公告天地植壁秉圭請代以死至忠竭誠則始見於金縢受遺託孤

則恭承乎玉几爰畀顧命乃攝寶位冢宰作誥百官總  
已於是輔導幼主咎撻伯禽坐明堂冠冕旒撫四方朝  
諸侯吐哺握髮制禮作樂卜世三十卜年七百營洛邑  
均道里設官職列朝士序同異封子弟建磐石之固宅  
維城之利五侯九伯犬牙相制揚文武之烈光率祖宗  
之大締監二代之文物揭萬世之典禮噫嘻我直如矢  
我道如砥變生於獨惑出於似君子既誠小人乃毀貝  
錦萋斐箕舌哆侈近則成王不知召公弗喜遠則四國

橫議曰公不利据手瘡口跋胡蹙尾羣輕折軸積毀銷  
骨青蠅上壁點白為黑衆口鑠金呀叻利喙鴉無好音  
車有載鬼蠱氣豺目蛟涎虎噬公於是時了不芥蒂是  
用居東以伐作詩以遺不顧小忿斷以大義誅殛讒亂  
表暴仁智罪人斯得神告以異大風偃拔開悟主意羣  
公盡弁乃啟金匱曰公勤勞訓我孺稚衮衣告歸天地  
薦祉歲則大熟禾則盡起攝政七歲明辟復子啟封七  
百土宇世嗣老於京師備道全美巍巍乎高哉遠哉兮

宣德音以不瑕嶠然不滓豐功盛烈與日月而齊光兮  
烜赫晃耀乎垂千百祀魯侯受命祭以天子血食萬世  
流澤千紀榮華至今歌頌不已漢唐而降土木其峙想  
望風采恍惚夢寐載在祀典廟貌簠簋曰岐之陽在水  
之溪面終南兮俯清渭瞻睥容兮望遺趾睥睨爽塏兮  
髣髴英氣殿沉沉兮穹窿神其來哉兮昂昂顚顚層垣  
落日兮古木號風停流澄碧兮晴影涵空丹楹剝月兮  
繪壁噓龍繁雲翳翳兮暑雨濛濛遺波餘澤兮幾千百

年濫而為泉兮滙而為淵醜而為渠兮需而為川鍾雲  
渠雨溉我甫田沃壤萬畝汧洄千里契理亂鑑臧否或  
通或塞或涸或沸守令得其人則決不得其人則止歲  
在閏逢際聞可歷肆沕滴以曼衍極舒徐以逶迤蘭澤  
勃以滂湃晷澈冽其擲比潏堆埼激霄墜宗硯硠漢泚  
汔淪湄潏潏靡紓沍沍洞淪淪泚泚蒼崖峩峩兮白  
石齒齒若乃支分派引旁午錯出滌闌闌澆井里浸淫  
逆折乎蘭若之圃汗漫溥博乎絃歌之地濡鱗翼於將

勦蘓根莠於既殘惟餘閨之所決無一物而不被至於  
風亭月榭層樓觀閣流珠漱玉清聲爽韻洋洋乎方池  
曲江孤嶼絕島沐浴長養乎春陽而秋艾天波空鱗雲  
山倒影涼颼兮皺輕碧急雨兮斂新霽皓月沉素餘霞  
弄綺雁落兮修連生魚吹兮圓暈起沙堤兮蓼岸花妍  
兮草媚客有乘范蠡之舟橫桓伊之笛延馳影以綸釣  
汎淒颼而膾鯉抹毫而吟挈榼而醉不事王侯屣棄名  
利而深入乎煙霞之際以索於形骸之外養乎中和之



氣此智者之所樂而不可勝記夫是之謂周公之水辭  
曰我思古人兮永想風聲徘徊明廷兮瞻仰儀刑野人  
何知兮桂酒芬馨禳除凶災兮祈請冥靈歲時豐樂兮  
吏治不驚奉法循度兮天王聖明我思古人兮姬公孔  
子忽乎其有見兮邈乎其不可致如有用我者兮期月  
而已將以敬天之命垂於無窮詣於極治兮請俟周禮

西園八詠賦

明 沈周

粵惟苑囿園池之屬關中者鄙夫無一隅之及一日之

覩矧聞之髣髴於今稽之掛漏於古聊準長安之西笑  
託公子之夢語嗟夫上林蕪矣甘泉莽矣御宿徐矣樂  
遊泰矣西郊之免跽矣宜春之麋麋矣梨園燬而磔矣  
凝碧夷而土矣類皆前王遊畋歌舞之區鄙夫蔑有所  
取也取則不無郭令公之仁里邵故侯之青門李將軍  
之北郭王右丞之輞川俾人追惟於往致儼水木之如  
存又不無代遠人非於慷慨然然而何地無勝何代無  
賢何賢無述何勝無傳時則有若耀之為郡實古雍地

平原撫而裔衍諸陵矗而足峙荆耀而玉韞地靈而零  
萃截薛突秀而近拱漆沮流潤而暗匯壯哉三原之佳  
甸洵矣三輔之遺治屏八垠曠蕩之風鬱大塊塊北之  
氣負陰面陽審形遵勢宜賢者之胥宇嘉勝者之收麗  
百堵仡千弓迺迺從相卜迺從窳厝迺從構架迺從樹  
藝孝以為基忠以定位擴中類仁制外侔義方之象行  
圓之比智厚以積德高以抗志於是大司馬公拓為西  
園以藏以修存誠而樂道觀物而玩化非文饒之錮愚

非季倫之泰尤徒悅耳目而恣般遊者也有碑勒銘在  
幕中堂史氏大書燦爛厥章於考世德於發幽光靈蔡  
鼎鼐而薦力文霓昭晰而呈祥其側有堂兩廂翼成揚  
蘭薜蕙茨芸填蘅浩浩穰穰儲書滿盈紛者百氏秩者  
羣經標牙刻玉籤軸熒熒其前有池混混且泚不漿不  
溢不淪不洩擅雪滌之專攻潔垢硯之遺滓日新日資  
舊染是去方沐之槃譬飲之洗有松於軒徠服其隅離  
立矯矯直不假扶結瑤為根聳玉為株冒雪而腴被霜

而腴負大且固葆貞不渝歷載而壽無度效材而需不  
訾有柳苞矣柳門之側匪朝匪夕先公之迹骹骹櫛櫛  
紅總翠輶畧和嶠千丈之譽襲馮異大樹之烈公之理  
南都也其在默運疇眇疇測其在獨斷曷憑曷藉祁然  
而威行沛然而德化潤廣則何物不沾庇大則無物不  
借民仰如雲所謂用作霖雨而澤下者也曰州曰藩公  
所蒞止化覃澤加則民之衰孱寡弱猶培而庶猶溉而  
華轉富而易庶若出乎咄嗟民之佩荷激切將以棫樸

榛栝比公所樹之柳甘棠綠竹比公所藝之花公尚以池凡庶執事爰有汙墨沙之汰之蕩之激之公尚以記末學膚受瑣才小能舉錄而鎮採兼收而並登揆方圓而施用期將就而勸成方我句吳之墟澤流湯湯為割屢年民告飢墊天子簡公來旬來宣民乃驩呼拜逆鄙夫亦獲瞻承光霽識公宏正而亮鎮簡約而靜淵以之柱石則明堂底定以之調元則庶徵罔愆其時也於公之園奚止二四之可賦來百祥之駢駢草靈芝茁木仁

理連華峯燿燿醴泉涓涓或蒸之孝義或應之忠蓋其  
氣在人酬酢於天尚為公賦之以屬於篇

夢遊太白山賦

并序

康海

余歷覽載籍所志古人之辭由屈原宋玉以來不可  
勝計而浮靡侈放之辭益託諷寓興者之所共趨上  
林之後益蕪益漫亡能爾雅志士之所賤也余感風  
人之義因夢遊太白山歷見竒瑰駭異之狀而作賦  
雖極假借要皆自喻其迹少有虛謬諛駕凌絕之病

示諸同志皆曰可錄

弘治閏逢攝提格終相之月康子夢遊太白與金子可卿乘馬領僕各執糧糗飫飼之物浮漆渭跨郿塢環惇物逾武功去約萬里四望塞蔽恐怖獐突惶惑震厲若將遂為虎豹之噬有老人者雪髭鶴髮電目龍顏自西而來若愛若識請以前路則笑而不言少頃復去金子曰若非山川之精耶豈將疑我以迷晦顧我以虛誣也乃躡以其後則豁然四開巒回徑折泉下雲散予曰是





乃爾若神物之可憑歷千岩之邃嶺山石儼乎華嵩細  
流浩乎滄溟蓬蒿翳乎峰壑墜葉震乎雷霆老人跨鶴  
從雲前下笑曰異乎子之善勇也夫太白始峰炎暑冰  
泐萬夫之勇亡有敢及况迨於是夫是泉脈應乎坤軸  
遮飾極乎越區天扃通乎可聲神祇恍乎可呼至循崖  
之前重谷之裏百鳥不宿神獸亦避雖至人亦蔑有入  
也越此百里西下陰壑復闢峻岳則金屋龍棟控亢聳  
搏異花雜乎瓊瑤仙風冷乎清綽靈芝馥乎滿郊麒麟

馴乎盈郭龍蹇屈於平池鳳翮聯於長漠此則上帝之  
秘區而太白之關鑰也其東百里瑤宮並殿萬戶齊啟  
蒼光青氛四面周起函丹書於億笈紛朱絃於兆徵散  
靈繭之如斗歷綺縠之奇靡總百綵而具存奚瓊桃之  
如繫此又太乙之宅合陽之宮至其南也朱雲陸離丹  
閣霽霸神桂宿日南極奉塵羽翰極乎麗暉珠貝極乎  
雕飾鵬鶚駕而鳳軒鯨鯢御而兕履是謂朱明之宮天  
帝之闕北則至幽號曰玄府紫微之所宿萬象之所聚

玉臺瑩光冰柱炫色珊瑚如林水晶四徹雲沆漭而守  
默氣鬱森而馳起靈龜元龍參錯其下松檜接乎帝閭  
金碧曳乎泉石翼八獸以守衢役百神而司臬夫皆五  
天之至精萬化之樞紐能有至者皆必具靈負秘與抱  
圖膺籙之士有天人之德者也已而風柔香墜路豁視  
空若雙龍之負引倏靈宇之就中仙姝麗乎兩間洞簫  
錯乎萬筌浩歌凝乎飛泉朱絃颯乎翠空座列煥乎雲  
端境象委乎穹窿環珮鏘乎旖旎禮數儀乎動容予乃

攝衣升堂長揖就位悟人世之囂紛歎靈局之皇閔乃  
與金子終身同丈人居之不去

華山賦

許讚

噫吁魏哉華山質聳千萬餘丈於鰲極之初分其高無  
垠根蟠千萬餘里於混元之始判其大孰倫突出雲表  
直指天津噴吐風雷拂拭星辰慨自洪荒以來義農之  
創則軒唐之造鈞舜禹治績湯武革因皆興起於岳麓  
之左右孰不法象乎儀則而仰遵乎明神迨夫秦漢以

下則但知陳玉帛以徼福具牲醴以致禋而已孰知獄  
宰西方秉灝靈掌商政令肅貞上天付以收斂劾實之  
名號委以清汰勤政之權衡凡物之未過者不阻其長  
養物之太盛者必伏其裁成故月無禁次日無逆行雲  
無妄發雨無妄晴禾稼不得過時而暢鬱草木不得薦  
候而妍英夫西行為金金禁也物之流溢茂濫過常度  
矣禁止之而不得肆金色為白白質也物之炫耀文采  
失本原矣迫還之使歸於情匪曰摧其華節之則復生

匪曰傷其英斂之則復榮此嶽之性情司令通萬古徹  
八紘而無息無更者也以言其景象則黃河洶湧望嶽  
而南注者若朝涇渭潺湲遵嶽而東過者如緯玉井澄  
冷兮蒔寶蓮之奇祥月嶽窈窕兮森蘿藤之芳蔚坪青  
柯兮蒙古樹之槎枒觀白雲兮聽飛泉之鼎沸其至奇  
者五指嵒我於凌巔千載具瞻而可畏名為仙掌不知  
何謂豈以制引煙霧虹霓而節宣化理抑指揮垣度辰  
躔而佐調元氣乎其名曰華者則以其亭亭萬丈而巖

巒交匝靈秀萬狀而四出如蝟磔硤無窮稜層難既依  
稀乎紅紫蔥蒨乎蒼翠或析辨分枝或呈葩衍類望之  
者真如芍藥芙渠而四面互植玉樹玫瑰千章交節也  
名之曰華是為可貴

夢遊山賦

楊爵

時和煦以轉泰兮歲惟丁夫壬寅余彷彿於夢中兮夢  
歸遊於咸秦歷韓魏之故疆兮泛柏舟於渭濱浮肥颺  
以遠覽兮暫憩夫山之危岑乃吳岳之崔嵬而秀麗兮



古號曰西雍之鎮峯突岼以峻出兮勢若連乎霄辰石  
巉巖以峻增兮百壑研其嶙峋風習習以清和兮迹迴  
脫於世塵草與木森森而夭喬兮秀雲邊其萃尊鳥與  
獸蹢躅而頡頏兮若解意以相馴予乃采芝蘭以聊茹  
兮氣和煦而苾芬挹清泉以時酌兮蕩吾平昔之塵襟  
忽回顧以寥廓兮百峰羅翼其共臨俯仰余長嘯而朗  
吟兮高冒次以樂真山有廟焉迤邐其麓之東南兮以  
時妥侑乎嶽神棟宇苞翬其壯固兮丹青煥乎維新背

嶮嶮而面涇渭兮延廣袤其幽沈古取夫萃與渙之大  
義兮儼嶽像以獨尊予乃肅容儀以瞻拜兮心慄祇其  
快覩復長跼而祝之曰惟明神其監觀於下土以大義  
而降禎祥與妖孽兮斯固無幽而不燭夫何世事之紛  
紛乃有稽典訓而不類兮固予中心其眩貿予敢筮游  
衍而不予隱兮願得夫子奪之微故惟予小子之有生  
兮何不辰而遭世風波洒憂時之血忱而貞志於乎先  
兮固久罹於窞坳時省愆而思咎兮求不忝於屋漏於

歲月之陽春兮今已兩過念予總角而志學兮每矢心  
以克邁嚴步履以出戶兮敢斯須而或怠景先哲以周  
旋而與歸兮忽凶害焉其顯崇固予小子反復思之而  
莫知其謂也語畢悽慘流淚潛然偃僂伏俯聽神所言  
惟神輟爾而有聲兮復喟然其長嘆曰嗚呼來汝小子  
兮是爾之愆爾不聞曲其躬而圓其行兮取封侯以相  
先或有貞直方而未少回兮死固不免於道邊當行而  
吾行之兮當止而即止斯先達之明訓而可敬服兮胡

不珍身而量處道固不能無消息兮應斯有常而有否  
苟相幾而或少戾兮夫孰非以災而自取惟明哲之見  
高一世兮動自遠於坎硿燭隱機而尚肥遯兮泛長江  
之一舸乃有迷檢括而寡諧兮拂潛晦以自頤銜崑山  
之良璧兮人共惜夫楚和履大閑而不苟措兮固自謂  
世所尚也當杓鑿之不類而欲強置兮孰不指身心以  
為訛嗚呼小子而今後其尚疊疊焉以克勵未可以一  
廢而遽挫思福堂之玉汝於成兮方一念之偏頗惟古

良士之堅志於患難兮思尚友以切磋寧雉介之耿於  
羅網兮勿狡兔其爰爰寧松柏挺挺於歲寒兮勿桃李  
其灼灼何所往而非吾可安之地兮慎無怵中而懷憂  
彼皇矣之全賦於有生之初兮惟反身而是求聽吾誨  
爾之諄諄兮尚不忝於前修苟迷途其終不悟兮將脂  
韋以自羞予乃再拜稽首而起應噍噍其未已旋周旋  
以出戶忽驚愕以覺悟時東方之既晨愧絲粟於枕衾  
嗚呼天耶神耶教戒懇切誠可信而可遵大道坦坦而

無曲兮固不越乎吾之心

觀字篇鉅賦畧

文在中

夫八郡三陲更僕未易卒業請略道鄴鄣之舊而吾子  
自分寸焉夫關中據六合之上游負函谷之天險庖犧  
神農軒轅帝嚳以來周以鳳騫秦以虎啖漢以龍興唐  
以豹變隋以鳩張苻堅姚萇西魏後周以狐嘯而猿喊  
璽而皇者五莽而帝者四是謂秦地披山帶河四塞以  
為固入關而都案秦之故此搯天下之吭而拊其背奉

春以之而建天策關中左轂函右隴蜀沃野千里南有巴蜀之饒北有孤苑之利三面固守獨以一面東制諸侯此所謂金城千里天府之國留侯以之而贊訪謨秦形勝之國帶河阻山懸隔千里帶甲百萬秦得百二地勢便利下兵於諸侯譬猶居高屋之上建瓴水田肯以之而賀廟筭塹華為堞因河為池據億丈之城臨不測之谿有席卷天下包舉宇宙囊括四海并吞八荒之勢長沙以之而過祖龍三輔之地南界江淮北濱河渭汧

嶺以東商洛以南厥壤肥饒此所謂陸海之地曼倩以之而獻武皇前臨沙苑後枕虎岡左控桃林右阻藍田漆沮經其東涇渭遶其北依山為險形勢雄壯雍史以之而標地靈則關中形勢甲於天下秦中自古帝王州咏於詩人殊非虛也是故金精方盛天畢用權駕鯨鯢之舟渡渭水之灣過咸陽之域思阿房之宮其下可建五丈旗而坐萬人閣道迤邐屬乎驪山之陂者殆二百里宮車顛顛而度馳懸橋而轢天宮愚黔首而莫測橫



半霄之蛟龍雖既招八州朝同列鑄戈鋌為鐘鐻殄滅  
三代之子孫隍濂六王之雉墉乃始皇帝之為人下絕  
地之紀上斬天之脈而刺嗜遐思鞅倖而伏諸胃臆者  
何其雄擷燕趙之菁英籠鄭衛之處子幽鬱而閉夾槐  
垂柳永巷之內且三十六年猶爾屠湘妃之廟冒博浪  
之椎伐五大夫之松命盧敖徐福驅童男女數萬人嬰  
姍扶杖而陟蓬萊方壺崑崙崑崙之危峰然而戴岌天  
之竹冠登華岳芙蓉明星之嶺擎蒼龍之鬣而西顧繫

飲海之苴屢躋五月積雪疾風暴雨太白之巔乘陂半  
瀑布之雲而東瞻揖黃河龍門積石萬里洶湧之波而  
問道攀崑崙瓊瑤三珠之樹汎星宿之海而撐船詔渭  
伯來鼓檣檄涇侯使張旌駕鴻毛於弱水過黑津而陵  
瀾當其青陽謝侯朱明統天馳馬畢郢奉天之原而跼  
青莎則漢唐之陵壘相望未始不動六合之思而願為  
赤龍子天策將軍執鞭至若祝融揮汗而却步蓐收鼓  
浪而潺湲貿瓜楊城之隈以傲盛暑問酒新豐之家而

涉灞橋則隋宮雖以阨陟粉榆猶樹舊川釋十六苑之  
湖池海藪而幸江都稱觴未央而與仲較生理桑枝遷  
於海上蜀王化為杜鵑紅塵萬古白雲橫山布衣與朱  
黻未知孰尊鴻溝疆界今已漲漫馬上顙顙徒掣龍淵  
粵惟漢之故都於今實為長安英雄之遺魂何在娥嬈  
之粉黛成烟不堪東郊皆禾黍令人咍唏淚泗連吾聞  
鑿昆明之池以習水戰豫章臺之石鯨魚不識其遇雷  
雨之期而猶鳴咤動其鬚尾而鼓其喉舌秋風飈子之

歌可為呢咽柏梁窮迫幾窮之韻東方生於茲乎不復  
謳左牽牛而右織女空取象於雲漢亦罔跼乎阿陬臨  
影蛾而翫月思宮嬪之乘舟築通靈以懷舊顧青鳥而  
生愁毓皇躬於猗蘭逢七日而張僂遊結衿之太液悲  
啄菰之鳬鷖經焦獲之古藪尊白公之渠流越甘泉之  
垓垣踰通天之高丘過枸邑之深谷訪大厯之壽湫嘉  
鄭國之灌溉請水工於韓侯頌成雲於舉錡欲作雨而  
決溝觀彭衙之戰處覽咸林之蓮洲緬緇衣之遺武壯

孟明之焚舟閱鴈塔之蟲勒夢學士於瀛洲蓮名燕之  
曲江想天寵之綢繆出種瓜之青門嘆邵平之無求嘯  
雲霞而覓侶何駢趾而結瘤若乃麒麟之圖像十一人  
而不得與博陵之後典屬之前則魂悵惘而若怯凌烟  
之功臣二十四而謀謨不得房杜次韜畧或與英衛踈  
則撫遺趾而三嘆祇跼蹐而躊躇孝文之受釐宣室處  
今仍在恨不得干前席之澤與少年之洛陽人論鬼神  
幽明死生之秘說非不會於氣諡但代神荼而鞭度朔

之梗魁駕天寶而出宇宙以馳驅明皇之金鑾殿沈香  
亭嚼裁而幾顏恨不聳李白賜食調羹之寵賦名花傾  
國之句而賞四本芍藥之蔭蒨馮夷擊鼓湘妃出歌岑  
參之兄弟非不好奇每過漢陂而思嘉魚秋槐葉落萬  
戶傷心王維之忠肝一片不下睢陽與常山睇凝碧之  
池而或為若人三垂胡杜欽對策何如幸芙蓉而下馬  
之董仲舒覩白虎之嶒岵而阮吾前傾天人性命之囊  
世卞氏三刖於荆山之璞而玉何沽張禹說論語尚書

何如扶風之峽不辭寒暑而讀書之馬季長賂金華閣  
之屈侏乎雲灘乃知翦筭而讀墳典丘索之殘篇不翅  
倚相神渥六經契斷八卦籠絡風雲磊落之才燾於幽  
僻厥初枉六射而懸弧箕闕未央長樂建章甘泉五柞  
之瓌譎而紆鬱創於秦漢捎天星而干閭闔之間乃草  
元執戟墨卿翰林可推第一猓猓焉懼不得步金門而  
上玉堂黃衣白鳳之辭取而覆瓿仙林望春翠微大明  
興慶華清之黜然冲融而博敞經營乎隋唐已遺鎬池

之蒼壁而不寤徒勞由余之鬼為而向愚以采蘋之淑而賦樓東以侯夫人之偶而懸朱棟千古大不平事殆如寇覓况辭人騷客邇夫珎士幾得志於枚箇焉握瑾而持瑜不願學鄼侯藏六家河洛之秘圖於石渠而究要害焉得偕子政校七十二乘之奧典於天祿而然青藜桓溫非鍾期則攜手王景畧之豪傑捫虱而談世務於華山之陰門前水倒流望人十年而不出吾何待則始掩僧一行之北斗七星於甕中推歷法於銅人之廬



王官濟河而封穀屍吾將罪穆公不用蹇叔黃髮之言  
而襲鄭之東門終非計致大鳥於喪前垂關西之師慕  
設覆鼠以肆嘲歲星照於華隅起黃帝而作史懸龍門  
而垂鬚良弓藏於鳥盡弔淮陰於櫟墟步咸城之北原  
嘆子房之與商山同區軾華胥於藍郊奠桂酒乎平蕪  
訪尊盧於南陂憐牧豎之掘狐帝嚳藏骨於郤陽先莘  
女而孕秀腴蒼頡伏綠字於白水聽鬼哭而陵煤瀕陽  
老将夢王翦細柳旌旗憶亞夫杜郵白起復何罪韋侯

道園亦非臞陳希夷青坪之睡洞可橫吾之肱而卧其  
廬秦王子嬰奉璽之枳道徒流涕於始皇之長城而思  
飯清蔬華子固乃輞川之絕勝安得偕摩詰而戴茱萸  
特勒驃為六駿之超蹄越醴泉之石刻而踟躕指戲亭  
為笑柄舉燧燧以悅衿裾有扈氏與帝啟戰於甘之野  
則在鄠東鬼塊作書三篇責禹亂天下事厥說有根而  
非誹於膚謁渭原之草而踟躕拗黃河之波而陪鯢攀  
文武之陵而收泊蹠高景之寢而涕垂翹崇嶺則揔躍

而欲騰驤俯深崖則拯羸而謀療飢經略乎八水之濱  
而茭荻網踣乎五陵之衢而颺風吹秦來漢往騷騷  
焉如麋鹿之逐西陂前古後今覩縷而起在予心如蠱  
蠶之抽繭絲則吾安得憩鳩摩之淨土樹兮摘八月之  
桃實而袖歸扶仙人之九節杖兮柱玉女洗頭之盆而  
浣埃緇騎龍首之蟲靠以周視兮索渭水樊川之窟宅  
而棲遲餐終南之合離丹青而點金銀兮誦儵黜詰曲  
之辭於昌黎連亘乎太一之礪俛揜雲霄而直上兮近

天都而問阿維陞驪之坂曦東西之兩繡兮下蓋於溫  
泉濯予纓之颯纚慶之風雷湧面堆阜出兮重俞俊陰  
陽之說而扶冠縷歷七盤之十二綵兮菟藍關之雪跡  
於嶮巖覲仲之巉岩兮思圍獵而致風雨之涕洟石鼓  
之原問承露之金盤兮躔逡運而臺榭縻王嘉隱於象  
山兮聞倒獸而詢渭涓少華多荆杞佐白帝施雨澤兮  
崩於宋而亂石陸離鳳御圖而至扈岫兮軒皇拜而受  
之青石出於磬山兮廢四濱如白磯三石鼎峙於漆水

兮萬斛如斗形之旖旎獲寶鼎於汾陽兮至中山而黃  
氣氤氲以淋漓鰲背之峯巒若龍相之所鈞兮吾將郅  
龍門之懸泉而暴腮九峻巒巒六百餘尺兮上石門攢  
天之嶺諸岫如鋪碁紫閣峯陰入於溪陂兮落雁高絕  
可通帝座恨不攜謝眺驚人詩來問真源於素威始平  
之原築於廣漢兮白鸚鵡紫駕旄牛青兕充牣其間徙之  
上林要非白衣分之攸宜太真終於馬嵬兮還一斛之  
珠竟有報於梅妃獵五丈之屯懷諸葛之英明兮馳鴻

門之阪嘉赤龍屈信之委蛇觀長平覆地之盤蟲兮識  
秦國之多赭衣令人俛眉而思古昔兮屈指乎西伯與  
庖犧西極子曰若淑夫賓之論萊乎融融纚乎洋洋然  
則雍之美罄茲乎西州賓曰未既夫雍跨有西北厓隰  
華陽居天地之大半吞邊域而為疆迤邐綿亘三千里  
海內之雄也由京兆至於扶風三百里隴關阻其西益  
門據其南五水所會三秦之一此古西伯岐周興王之  
地驚鷲之所騫翥汧隴之間又一大都會也赤烏銜書

天柱峽峴實誕聖瑞爰基鎬豐石鷄晨鳴陳倉之峯聲  
聞三十里音中商宮吳岳為雍州之鎮曉光連翠嶽而  
容裔望輦大賢竒岫五出埽霓而摩乎層空天水大坂  
是曰隴山九回不能窮其隈七朝不能越其巔隴頭流  
水不堪聽顧瞻而生悲思肝腸斷絕而望秦川諸葛亮  
與司馬懿相拒於五丈之原彪虎颯颯如欲吞餐道  
之間奮化為灰塵跡淹蔽而黥黥與渭水而波瀾呂望  
釣魚則在磻溪石室窅窅而不見徒盼林岑之高低丹

喙鳴於樹間鸚鵡出於隴西問上皇之安否假郭浩而  
寄思蕭史吹於鳳臺致孔雀之翻飛得羽化之妙術偕  
弄玉而齊馳女登感於華陽炎帝生於姜涓臨西號之  
舊城懷文考之萼輝傷蹇叔之諫鄭嬖秦誓之知非周  
召之所弄璋乃詰濬之舊圻惟二張之繼產刑範垂於  
關西由扶風至於漢川七百里地兼梁雍之二州星參  
翼軫之四宿前瞰河華後蔽巴蜀崖谷險絕千里百折  
秦之坤地蜀之艮方關頭荆尾連高夾深漢高帝赤龍



之所提劍張魯之所狐嘯而竊據諸葛八陣之所伐魏而六出褒沔之間又一大都會也漾發源於嶓冢合沔池而為漢嘉陵潏沔艾若箭出散關經利閬入大行如匹練在戰國為白馬之舊都於南鄭有褒國之古塹天柱懸崖下有碧鈿藥婦醫夫化石為變石牛糞金五丁擘堰曲盤十八始登江岸金竹之縈流七十二略陽之渡口一百八山桔槔而虜豁水渺瀰而誕漫縱使中黃作鼎而發弧誰能沒羽洞褒斜之雲棧惟南北二日

之相距亘四百里而為行旅患獸蹄天矯而不敢過鳥  
羽譴喘而不能轉留侯燒天梯而韓成熙子龍壞赤崖  
而諸葛詘雖用情之不同皆忠白之僅見匪佐卿之化  
鶴豈能越飛仙之嶺而幻閃脫扁鵲之飲上池水亦難  
柔山消石穿幘頭之七十二洞而揖長縮之真面由扶  
風至於安定三百里水土雜於河西人煙接於北地咽  
喉靈武襟帶西涼黃流在其北崆峒阻其南隴山環拱  
渭波夾繞此漢之朝那介於涇原環慶之間又一大都

會也惟崆峒之杳冥而赫眙兮清烟與玉繩而齊浮軒  
轅既柴岱宗兮遂陟崆峒之別峯曰鷄頭廣成子處於  
東砦之陰穴兮外慮不足滑其靈修屈至尊而稽顙請  
益兮峭壁幽洞垠堦屹其猶留涇發源於城之白巖兮  
洊自華亭而上流揖渭水而會陂兮至龍門而洪河投  
殷之妲己尚有川兮秦王馬跑之泉亦渚沲而成湫皇  
甫謚讀書之處青草樛參於靈臺兮三都賦序體裁何  
容與而儵愬烽火動於蕭關兮動漢文之西憂武帝登

崆峒而出茲兮亮羌夏之襟喉王母垂五色雲而來降  
兮漢帝聽崑丘之謠於西州煙雲鎖於臺館兮問道之  
所下於重巘有洞穴之可求此蓋古之密國兮頃聞康  
公與其王游西北不必秉斧鉞兮入我版圖已成千秋  
皇甫規恥不與黨人兮自繫廷尉而固知愁厥妻草書  
而屬文兮罵羌人而不為夫子遺羞皆溪山之秀氣兮  
邈古昔而寡儔璘與玠之戰功兮亦彪炳而可蒐由安  
定至於隴西八百里天水名郡關西重鎮倚西傾朱圉

鳥鼠諸山以稱雄接壤羌裔通道西川背山面池襟帶  
秦隴之間又一大都會也於春秋三代之前兮本氏羌  
之所居至非子之養馬汧渭兮孝王封於秦都隗囂與其  
將王元協謀兮遂偕公孫子陽分隴蜀而崎嶇杜甫過  
之留詩於萬丈之潭兮並西地之十九泉而懷諸李白  
逸才乃隴西之苗裔兮與其祖廣射鵰之手奪成紀之  
膏腴紀信姜維皆偉人兮死君之難輕其軀如錙銖充  
國產於上邽兮金城方略垂於麒麟而與博陸齊驅雪山

冬夏不消兮西傾載於禹蹟  
嶓嶭導漾東流為漢兮乃  
大江之頭顱庖犧陵在三陽之寨兮  
蓋由履大人之迹  
於華胥冠三皇而首出兮  
畫八卦而制鴻隅乃知崑崙  
信天地之元首兮以故關輔為諸  
聖胚胎之所須由隴  
西至於武始一百里控邊陲而為  
域接巴嶺之襟裔南  
得鍾存廣其腴土北阻大河以為  
險固皋蘭峙其前長  
城為之障此嬴秦之舊封隴西之  
故地又一大都會也  
惟皋蘭之岵嶇兮為州之主山其  
下地勢之平坦兮可

屯百萬之兵而令甲頌崑巍而峙有嶮嶮兮西秦築城  
於此而歸熾磐洸河之源出於塞外兮流入本境經數  
百里而曲盤膠瀉消洶聲如萬雷兮並東峪三岔激灩  
而相連蒙恬發兵三十萬北築長城蓋在斯兮一朝禍  
起蕭牆山東諸侯入於函門李晟之繫朱泚息奉天之  
亂兮望墓草而悽慘由京北至於北地九百里城高如  
山池深如泉原阜錯列溝澗輻輳境接羌人山川險固  
為關輔保障鎮於邠寧之間又一大都會也惟不窵之

舊都兮在昔號之曰北幽寧為古之義渠兮秦滅之而  
建屯真乃隋之羅川兮獲玉真而得名馬連出於合水  
兮九龍遶乎寧城鷺池浚於昌言兮厥洞窟窘而涼風  
生小鹽池為三輔之利兮花馬與宇羅而相縈陟靈武  
之臺兮肅宗登極之所猶未傾越范仲淹之舊宅兮馬  
既過而復更讀郭子儀鐵券之碑兮嘉其孫訥用思之  
為精岐伯之素問難經於此作兮弼軒皇而究癰癥獻  
吉筆冠一代赤城乃其母家兮訪諸故老得之惆悵而



意不平由北地至於上郡五百里形勝之地五路襟喉  
洛水之交三川所會北接邊塞南障秦邦中外之衝鎖  
鑰之關又一大都會也惟橋山之蹉跎兮葬我軒轅之  
衣冠邈倚寒產林木鬱蒼兮上有古柏之丸丸蒙恬扶  
蘓監兵而築長城兮何一去而不還黃河流於東北兮  
洛水經而為長川直搗土門之十八寨兮猿臂之李廣  
不侯而負慚涉奢延無定之波兮渭濱咆勃而激乎赫  
連誦秋風白髮陳祐之詩兮我馬迴復而周環過中部

而謁黃帝兮雲色芙蓉眼亦向睇夫玉仙少陵豪傑寓於  
廊之城南兮寤寐孺弱或啼饑而彌年君子良窮何悻  
然而發浩嘆兮為饑寒所迫而聲嗢嗢白雲片鶴之遇  
趙鼎兮識中興之名相於汴前後至吉陽而相逢兮知  
浮萍世上死生之有定緣由上郡至於雲中五百里遠  
際龍沙四無襟帶營堡相望烽燧連烟東枕高丘西橫  
大波南阻岡陵北迤沙漠此亦雍之一大鎮也惟秦之  
却外患兮樹榆枝於塞溪古號為九原與勝州兮蓋三

輔之障隄經石峨峨而艷赫兮近代築榆林為城隄有水迤延來自沙漠兮從石而下陡落數千仞如倒甌孤懸一方所謂備榆中之關兮誰其策士馬之竅疲安得倜儻大畧之士還我舊物兮寄言當塗勿聲腴而遺茲由北地至於朔方五百里黃河遶其前賀蘭聳其背靈武古界西陲巨屏西北以山為固東南以水為險於春秋為羌人所居於晉則赫連夏都會之地唐末據於拓跋思恭宋興城於厥孫德明此又雍之一大鎮也惟賀

蘭之山龍從而愼歷兮丹崖翠峯盤踞數百里以稱雄  
草木葦茸而果園城兮塞北江南讓其雲烟之鬢鬆石  
紫黑鷹偃蹇而不可路兮琥入惇子澗溪險惡人蹤罕  
到咆咆紛紛獨逞獸蹄之倥偬蒲草鴛鴦澗水澈決而  
澹泞兮紅花秦梁分河流之波而溉我黍稷賀蘭之上  
有元昊之舊宮兮人雖予賴牆壁猶儼然而橫古松築  
高臺而臨之以極山川之偉觀兮沙土萬里清驢馬所  
用其翺幢黑山黃沙征夫之所宿兮閨人出閣望北雁

而曜容斯諺而腸斷不足言之過兮樹之丹棘要不得  
消此離宗由函谷至於酒泉三千里襟河帶山為羌人  
通驛之路環以祁連合黎之峰漫以居延鮮卑之水萬  
山環抱三峽重圍紅崖峙其左青海瀦於右漢武始置  
酒泉武威張掖諸郡者即斯地此又雍之一大鎮也惟  
祁連之峻號天山兮草木茂幪冬溫而夏涼天梯青巖  
偕焉支而摩蒼崑崙山積雪不消與日相連兮周穆見  
王母於此跪陳觴而踉蹌積石三危禹之所導兮皆羅

列於龍勒之旁風卑禾羌獻我青海之地兮魚鱗背負  
黑點而飲玉漿弱之餘波入於流沙兮黑水為雍州之  
西防若夫洮乃吐谷渾之舊邑兮岷亦古之西羌夏禹  
見長人而受黑書兮是在岷之下遣歸霄而遺玉裝河  
州靖遠漢之金城兮紅寺會城盛景喬桀而斐亶羅於  
絕荒爪牙相控將數千里兮揜肩勒石而追拓邊者須  
戶庭夫八荒

龍橋賦

本朝  
韓詩

過那石有五以繼鰲之左足吾初覩天與地廼補苴之  
清寧通掌開芙蓉之西壁錢唐君遂萬督其血腥彼羣  
峰巨江在域中合天地山水為四大得非台莫或與之  
經若是陽冰七星實津其天漢祖龍表牽牛清渭使帝  
座接夫三庭不見衆輪之外廣漠馬賴之上木垆非煙  
凌而欲斷雲如女而忽停蓋下貢黃歎之寶馬上流西  
極之丹青過雨滿濤望美人於天末則何似一角九頭  
之睇躍於元冥說者以治其涇之支也涇尚不附離於

道元之撰又孰辨乎朝宗者萬表茲之一也而得頡頏  
於至濁之形峭函東據符禺南屏西則褒斜隴首之孔  
道北則雲陽谷口之依憑觀井星而人從縞出慨然念  
吾手之無梁何罔擬四海之波澄即一帶之渺若河山  
已奚俾夫戴日戴斗之躋升驪龍果飛梁之莫企造舟  
擅風雅之誕登架鼃鼃而九江坦道填鷓鴣而河鼓媒  
乘乃有伐蜀之子渡蟻之翁一浮而敗一餓而翻相期  
何後相涉何水遇者作帝之師惠者舉相之能雲翦霞



蔚波折流興決渠而降荷挿而成黃支大宛佩玉鳴箏端阿  
標犄角觝瓏玲目眩轉而意迷體逍遙而節靈若雲蒸兮在  
下若日出兮當心夾兩龍兮游蒼霧采秋月兮橫孤襟於是  
春漲鮮顥清英載陽王芻蔦藿馬帚懷羊無疵諸慮枸櫞甘  
棠葉藟本密夏納晚涼白華野菅桐木棲桑維神蓐收苦菜  
寒漿水臺亭厯蒲柳權黃綸組帛布冬日為衣菟葵馬尾蹶  
洩榼梨莫不盛往來之觀極娛游之樂備口腹之美竭聲色之  
諠襄公過陳而嘆興司馬升僊而題作苟騫崩之不茸雖揭

厲而難度爾乃制度精巧鴈齒絕程方圓合妙爰象錯陳般  
倭棄其剗剗王繭投其鉤繩上象紫宮之崢嶸下等寥廓  
之無垠南北交會雞犬相聞羽檄朝至皇華夕陳鳴珂甲  
第棧閣聯雲珠琳梵宇倡麗優伶炫靚服妖粉白黛青霧  
縠飄揚紈扇絡纓車香馬柔洞魄駭睛有時指壁而倒聽  
楓葉有時貫酒而往問黃鸝之聲四顧岸峙塏道蹇產畫  
闕朱甍壘嶄巖巖何必求閨風星林之離立又何羨乎喬  
松安期之遙遠舉杯屬月非卿不立非聖不成委裘之登

雖北延眺嘆其佳美魏亮之崇渭水百姓利其經營偃  
半月而作勢累巨石而代楹少游建大夫之號隱刑追  
擲巾之生間者風起濤作天吳震怒懷襄可虞鴻流湍  
渡壁立赧駭迅瀨增步渠溪澆淑潰獲戒溇漩滌滌  
湟澗瀆瀑租車壞覆而絕來崩石砮砢以前路盤渦谷  
轉凌海山頽擲蛟龍於大壑瀾浣演而雲迴三更戰鼓  
之登枕上萬派海音之響層臺韋竿不堪障壁馬空復  
徊吁然後覩河雒之功而唏噓慕哀曰厥德其熾溫公

哉曷不俎豆持萬年之觴哉陽侯痺威猶恐懼干其廟  
貌孰東門之老婦望石駝而却走哉亦有游間公子挾  
彈馳毬乘鮮策肥飲壑食流輕死重氣逞慾蒯侯實繁  
有徒跨府連州賦詩咏懷登眺夷猶騷人失意志士埋  
憂看出雲之初月吸碧澗之長蚪引聲踏臂竹肉旅酬  
或裂秋江之鍤籥或送塞上之箜篌點吸見青龍而捲  
甲秦觀纜錦鷁而韻抽起萬里於展足橫百丈以泛艘  
徹扛杓之遼海飛架漢之僊舟馬退而釋國士履進而

獲奇謀水涸則詠溴梁之詩天寒則歸龍鶴之傳曷不  
引人主於文中之宮擲杖而明其喬皇復使聞棋砵于  
方廣跨石梁以釋八風之愁橋猗橋橋猗橋我將圖三  
株之松於天外莫問浣花叟孰分其仔細蓋大笑秦皇  
之巡海右架滄津而空九寓之萬頭然後知建不拔者  
勢與空闔捍大患者力與岸爭少保之功業善世宰堵  
之傑構文星吾謂事有虛而有實亦一方而一周雁江  
之浮屠新泥塗以軒冕東西之缺陷簪多寶於芒勾故

西周之鼎盛人英物華男秀女貞敦詩服禮秉德令明  
公輔碩相哲穎修靈杖攜履過嶽峙淵渟聚似京維貫  
比重城轂擊雲動肩摩雷殷其下修額短項腹行脰鳴  
奮隼歸鳧狎鷺家鷦草木夭喬山川出雲地靈物衆不  
可勝倫勗功德之鐫自我光祿夫子而余不忍復訊雒  
鵲之間但見枕席過師治湟偉觀箕子排木曳馬載轅  
堞朋而環如耳而鉉蜷然雲裝襟帶其園脰之所鑣脊  
之所負或愜而塗或眇而附錡于峪而建瓴其患此瓠

中之路亂曰神哉豐霍茲下濟風雨從之胡然締茂世  
之規弘仁惠伯禹仰嗟黃龍負陽侯遁行瀾安步天挺  
斯人補天系地維圻兮虹梁繼山容水意黿鵲嘒建華  
以西斗杓離此橋亘空千萬歲卿日尹月周天麗

岐山懷古賦

并序

王穀

平居懷古雅慕岐風筮仕服官愴心周道痛兵燹之  
相繼致民社之丘墟萬姓流離一方憔悴荒城日落  
杳絕炊烟破壁風淒永無人跡曩時名勝悉成瓦礫

之場革代繁華盡委荆榛之藪撫今追昔感慨係之  
登眺興懷泣然泣下淒涼觸目悲楚填喉爰比賦于  
興衰實未裁乎工拙云爾

岐繇商祀天作大邦洪惟亶父肇此西壤地接梁山之  
脉星分鶉首之鄉甲雍州之膏美種柞械之幽芳沃厯  
荼于原隰奠瓠矢于陰陽由是山呈厥瑞川貢其祥天  
柱巍聳太白鬱蒼汧流分導渭水環襄姬圖式廓王業  
寢昌誕興奕葉篤生文王化行南國澤溥西方風淳俗



厚士秀民龐頌孔邇而如戴歌既醉以不忘近質成于  
虞芮遠威讐乎戎羌一時人文蔚起政教喬煌鹿馴于  
圓鳳鳴于岡啟白魚之先兆衍赤爵之流光遂有諸臣  
佐命多士思皇股肱締造夾輔胥匡綿十五王之厯祚  
垂八百載之靈長休哉化國展矣名疆自運會有隆替  
之異將世代為興廢之常降及後季相率孔臧沿為郡  
縣代有紀綱樹兩京之屏翰鎮三輔之金湯矜雄盛者  
譜豐功于秦漢誇富麗者揚嘉業於隋唐或擅六朝之

美或推五代之良歷宋元而太平屢邁迄明時而綏乂  
丕張廼為述稽隆勝允誦吉康上也穆穆下也穰穰家  
敦絃誦戶溢笙簧農服先疇之隴畝士食舊德之衣裳  
沐風雲者輝聯甲第咏榔比者積滿倉箱於是朱楹紛  
列繡閨成行百廬鱗集萬井烟藏貨泉填市筐篚盈廂  
遂有張翠憶駕元駒披錦穀曳明璫風流梁苑富貴荀  
香詩催金谷花照玉堂鶯啼寶榭燕語雕梁蘭薰瑤鼎  
蓉遶紗牀琴協太和之奏歌傳卜夜之觴極賞心之樂

事騁快舉於康莊亦有青山寄傲白屋顒叩牙籤萬軸  
縹帙千緗芸封鄴架卷擁曹倉或賭西山別墅或開北  
海幽房或食霞於鶴嶼或烹字於螢囊率彼都之蔥珩  
咸結調于琳瑯四壁鼓鐘佐熙時之禮樂千山花柳映  
瑞世之文章聿徵休美莫與頡頏不謂天收景慶妖隱  
欖槍萑苻蜂起刁斗塵揚兜鍪馳驟羽檄糜忙由是室  
家淪沒原畝拋荒親知零落骨肉參商斷上林之喬梓  
拆合浦之鴛鴦奔人民於燧鎬委陵谷於滄桑是以愁

雲結而成陣淚雨注而如汪試向空城憑眺不禁四顧  
悽惶人跡杳絕烟火微茫荆榛塞道瓦礫充牆風摧敗  
棟月冷頽廊飢鳶晝伏野雉宵翔鵲夜泣兮青塚烏暮  
號兮白楊鷹隼搏兮署側狐兔穴兮舍傍晝棟烟消莫  
問繁華故址瑤臺冰化誰留歌舞遺坊弔古徵奇山川  
黯淡尋幽選勝草木悽涼撫膺周原想見當年富庶蕭  
蕭遺孑半成今日逃亡白骨山高僅保離羣鴻鴈青燐  
夜遍空嗟殯首群羊觸目流離誰為繪鄭監門之畫頻

年飢饉何從望  
汲都尉之糧  
露宿原棲影  
形共弔星零  
籜散魂魄相  
將林莽昏翳  
怯度溪烟野  
月村墟滅沒  
驚看人跡橋  
霜吁嗟噫嘻  
舊事既難問  
新愁莫可當  
一望破垣埋  
蔓蘚幾家殘  
墓絕蒸嘗無  
人對月不揮  
涕到處思鄉  
皆斷腸痛莫  
痛兮家破慘  
莫慘兮兵殤  
可憐革代興  
亡慨總付西  
風叫禿鷁重  
曰空城寂寞  
兮逝水泱泱  
荒原冷落兮  
衰草云黃時  
期平定兮風  
靜牙璋重修  
樂土兮永慶  
椒漿

關賦并序

李楷

古人為關之義多於郊垌司譏登戒出入禦暴而銷  
萌以守以戰匪但義取於防也天下皆有關獨秦之  
西安以關中為名逖稽周漢隋唐之世建都以控萬  
邦門戶藩籬惟關是賴東有函關西有隴關移函為  
潼越隴為散乃至於鄰沙漠臨外域迤邐周遭莫不  
有疆域之慮焉或乃以疆域為遠近之程如記里鼓  
李子過之作關賦以疏其旨其辭曰

有游奕公子者足有重趼衣垢結鴉舌如星箕其言  
嘽嘽經邦之遠猷惟瑣屑之為敷以汰吏為封殖及抱  
關之蟻臣譎其詞而悅耳如有裨于經綸適適然遊于  
溟滓之野與辰放氏私之曰衣皮之人攘木茹皮以禦  
風霜絢髮閨首以蔽靈雨存冉相之淳龐仍神民于隆  
古不星分於混茫誰瓜判於九土雖山阻而川隔量包  
容以并舉無畛無畦何城何府故扶輿之大同亦先代  
之希覩後世不然百法煩增各有其宇關隘乃興歛中

臆而外拒痞元化而膠凝使通塗其滯碍剝多費之堪  
憎擊拆匪但乎糜祿冗員尤滋乎營蠅擁無抑末之旨  
客悲貿遷之登思飛渡而不得將棄繻而不能矧銳頭  
之總干倚要害以憑陵俾鄰國其生心予嘆息而撫膺  
何不徹去乎贅疣之鄙而示人以大道之弘乎辰放氏  
蹙眉而嘆曰惡乎可惡乎可予不觀夫心乎膜以藏之  
腹以囊之咽喉呼吸肢體丰昌輔車脣齒元首康強氣  
用其柔食用其剛斷堅韌之乾載歆沆瀣之玄漿頤地



天之冲和養榮衛之陰陽又不觀乎作宮者乎其丹其  
腹曰梁曰梁美輪美奐肯構肯堂實門戶之重寄時啟  
閉以為康吾非忍以誑汝請徵稽于亶父之遷疆廼立  
臯門臯門有伉廼立應門應門將將即石室之繩樞與  
穴居之巖牆誰其無需於鎖鑰惜升斗以愴惶是故古  
人之殷殷遠慮也既建國都遂及關防每先事而預戒  
盖有鑒於復隍吾與汝遐想乎居重馭輕之勢以攷其  
内外相維之綱緬周人之制法定山藪於職方惟其封

建之繡錯斯以遙理乎要荒左周亭而右召亭遂分布而相望循封濬之故蹟得山河之鬱蒼設習坎之險守幾巨鎮以雄張時則有若穀陵函谷設關斯當南轅轅而緱嶺北孟門之太行挹郊鄆之定鼎鞏洛邑之金湯路車不可以馳奔駸駸不可以騰驤歛萃律而如劒閣亦詰屈而號羊腸旌旗則有嫖怒招拒之五部戈鉞則有湛盧露陌之千鈺惟借此以省兩葉之斧柯詎有惜乎升斗之微糧子不知乎盤古諒有鑒於夏商失其勢

則代不遽興戎其險則國可遲亡是以平轍東依於晉  
鄙關右聿付於秦襄蕃汧渭之駟馬成咸雍之虎狼或  
聖占於紫氣或賢隱而羣蹙徵流沙之西逝何國步之  
難匡逮嬴氏之益侈扼六國之背吭來相如連城之壁  
納范雎入相之裝洵無怯于季子亦納交于孟嘗雖譎  
資于狗盜克亂正以鷄鳴鑑席捲之威焰作兀蜀之阿  
房稽此時之建置非一關之蔣蔣武關峽關嶺岓激昂  
屹少習以磊珂排蒼野以攸攘緬堯師于丹水弔古堞

于蠻鄉誑張儀之六里嗤楚人之一僮蒲坂蒲關河水  
洋洋固虞氏之京邑判為野之圃場秦滅晉而一之蓋  
銷兵器而資墉坊昔魏侯之論德險美山河之固而一  
急遑縱窺關之有人匪天命之靡常故赤帝子之隆準  
而遑絕笑內應者之失措而傍徨三戶果楚人之桀桀  
傳檄又義問之煌煌微項重瞳之暴殄於一炬何沛亭  
長之約法於三章爰至韓信之木罌既渡魏豹之疑陣  
斯戕旣入關之三道每引望而懷傷此則大漢之崖畧

也奚重訊乎隋唐遊奕子曰處左者防其右都西者備其東云胡不襲其舊陞長建邦畿于關中孰守其雌孰知其雄且外患之宜慮何先戒乎吾邦况古今之易姓奚守險之有終不擇人而選任難倖免於困窮徒縉雲氏之迂策將雌鳩氏之難通此剝民以奉軍旅者之所宜變計也盍取法乎良工於是欣然大笑拊其背而告之曰子言辯矣吾子不謾古人之有厯數者豈一隅之為安哉嬪者皆冀州以為都征誅則各異其郊壇亳屢

遷而衆蹙廼籲天於河干吾德尚有其代運八極環轉  
於無端昭后稷公劉之令緒徵去邠邑岐之艱難開八  
百之寶祚有禹貢之琅玕澤深廣而四被封碩大而且  
寬漢畧倣於豐鎬偉赤城之堅完前乎此為雍為翟為  
塞維三秦之脣齒相倚後乎此京兆馮翊扶風斯三輔  
之台曜密攢以潼東蔽而屏障庶其靖謖綸與共驩若  
夫宜臼趨洛而棄西文叔奮宛以回鑾帝不都於關右  
亦西望乎嶺岼稽其防微之要旨蓋嘗遠卻夫蹂躪惑

魏絳之不智悻貳師之桓桓故漢文之粟紅而貫朽武帝之出塞而一搏或加恩於甌脫或宣威於呼韓棘門細柳之赳赳羽林健兒之嘽嘽隋有宿衛之七萃唐立府兵之重闌文昌列將相於星緯九野共藩屏於天盤其近而為關者則有監田駱谷亘子午於南路涇陽焦獲依金鎖於同官西達鳳翔則有斜谷大散諸葛亮之所出師而伐殘也隴關大震薛防禦之所威外而戒隣也又有金牙之崢嶸青巖之屈蟠為陳倉之勝槩映吳

嶽之雄巔乃入梁漢則有棧道之危削鷄頭之巖巒青  
石之扼要陽平之聚團仙人之縹緲方山之幽寒或將  
入於劒閣或頻臨於漢濫惟漢陽之址昭烈之所以破  
夏侯惇也饒風之椒金師之所以怖吳玠也苟忠孝之  
不渝境以人而不刊其關虎頭馬嶺華陽七盤鐵嶺清  
風匪第譽姦平涼有瓦亭焉隗囂之所以戍守唐肅之  
所以牧馬靈武而盤桓也有六盤焉宣宗之所以成功  
吐蕃之所以失利而蹒跚也至於蕭關扼據如石斯盤



吳人遠憶詩歌攸嘆追英主於漢武猶崆峒以遊觀藐  
通稍與大峽咸抱弩而負蘭鞏昌則有首陽之魄嶠大  
震之岌垣眇玉壘於蜀道思鄧艾之征鞍匪三巴之無  
人得批郤而導龍臨洮則有積石鎖崑崙之下流金城  
壯名郡之波瀾慶陽北地是惟彈丸不窟攸宅形勝莫  
殫驛馬象其衝突清平消其揭竿延安廊時宜設三單

原闕十二字

亦備可汗永寧為古今

之餉道直羅存唐代之衣冠其遠而為闕者則有榆林

為鎮於勝州會寧接址於烏蘭若夫鎮遠勝金嘉峪石  
關玉門陽關之屬莫不處於極西之西極北之北亘不  
周以岌岌護神皋之涓涓是故關中之域修於區寰我  
疆我理將無憂患甘泉猶厪於烽火校獵誰盡於豪獮  
惟王者之大無外經畧之具聿端其或忽鉅而重瑣瑣  
畧大而事芟芟辟之處於屋漏下筦上簞吾未見其可  
也諒非過於勞心之溥溥於是遊奕于其容有慙其口  
喁喁仰天而嘆曰先生之言關也可以銘可以箴可以

法古而垂今余小子復何知夫蹄涔哉

史皇造字臺賦

并序

文龍軒

癸卯觀濤後五日至頡皇造字臺臺在昆明池左不知何時改為三會寺宇其上宇三楹外培塿數尺古槐婆娑其畔土人言下有仙草見之者不死故罕遇是時亭午薰葭滿目鳬鷺凌波終南山色襲人渭水晴光搖樹四眺者久之憶嘉州空階鳥跡之咏恍四目頡皇來虛無縹緲間也斯臺為古今第一文丘而

相尋於荒烟亂楚而莫問爰造斯賦以志勝遊

我欲蒐第一灝靈之菑萼於權輿兮障劫灰其茫茫極  
遠遊諸邃古獵奇蹟乎大荒奮亥步而未遂聊驅馬於  
周疆爰按圖而求古壘真憑几以數列觴蘭余心兮擾  
擾於逐鹿之秦漢睟盤眎兮騷騷然奕棋之隋唐時維  
藥館娑霓衣之舞濤門下白鷺之翔偕同人而選勝指  
昆池以騰裝有臺墳起歸彼平蒼四圍告垓三字猶張  
皤皤焉垂安國之柯郡萋萋兮窩王孫之年芳拾級偃

蹇極目周章西州賓告予曰此頡皇造宇臺也歲久而  
圯趾堙於潢變為蓮界蕩為狐場軒轍罕至鳥跡不彰  
零露溥文章之府蟬聲聒禮樂之堂臨風寥闕撫影虛  
涼傷岑參之野寺攬宋玉之秋光慨余禁兮宥越恍彼  
美兮頽長涇陽君嗟然為之不平紛鼓頰而琅琅曰聞  
之九州之隩實右我雍隴坂豎其頭顱鎬京拓其心胷  
下園之以八水上杓之以七衡陰陽屆東西之會子午  
協南北之中宜其胞無極之氣孕太初之精故磊塊鬱

勃落蓄而為仰觀俯察之神鋒爾其珠湧壁卓也地籟  
自鳴天網重暈倬章不絢素質初印邃皇解結盤古破  
悶日月賁其光華鴻濛失其混沌文實蕃而粟飄幽情  
燭而鬼遯蚪蚪繪妍姝茲生韻流為墨池濫為筆陳剡  
溪裁蹠中山束琬墳典垂芒丘索取娉兒孫諸阜臣妾  
連艮五嶽失高四瀆減潤錫車指於羣玉之巔剖符節  
於琅環之峻七十二家之所不敢登萬有千歲之所無  
能問誰其揚此匹夫標金簡玉冊之封我其為是片語

剖赤縣神州之蘊豈謾張挾天之辯空屑梁花之論於  
憑弔間者耶郇伯裔兄弟晉曰西風渭水落葉長安如  
叟問影何人探環悼青松於香積訪白鶴於樓觀認折  
戟於函谷尋膩粉於湯泉鳳岡寂寂麀麓漫漫幽徑古  
丘蔓草寒烟游人不道樵子實繁澧澣之雲物邈如卷  
阿之車馬氓焉僅有此一度之梵音相與低徊指點於  
空階也奚有夫去天三百而壁地五千何以峙之秦州  
卦臺魯國尼邱可以鼎足而為三厥宇內之絕峯峻巘

崢嶸嶙峋者吾嫌其無文咸螭侍若一卷於是晚風鼓浪斜日催鞭悵葭蒼其莫溯倏倦飛而思還西州賓不覺粲然曰今日之游奇曠過龍門之馬二客之讚開闢邁蘭臺之班頡皇可作同九錫夫斯言

金牛峽賦

劉榮

伊維鴻濛既闢兩儀判形山谷異位高下殊情或峻極於霄漢或深入乎宵冥或險而有鳥道之號或邃而有鬼窟之稱幽潛沈鬱突兀崢嶸固職方氏不能窮其數



山海經不能悉其名者也若夫聳削壁立竒峭天然隱蔽日月吞吐雲烟盡乾坤之奧妙成宇宙之大觀孰如金牛峽之險亘古今而無前以彼夾峙兩山中通一線危石巉巖魂揺目眩仰視則長空如帶驚翠巒之欲合環顧則崇墉如削疑赤壁之互見哀行人兮地底羨松根兮天半極世境之酷烈兮已令人却步而思返又誰為設此永巷兮長逶迤而不斷當其一天霽色萬里晴光亭亭日午倏爾輝煌撫清暉兮載路思白晝兮正長

猶得把景物以流連任緩步而徜徉若乃重陰凝閉四  
野同雲蒼烟大霧沒頂連根飛鳥悲鳴而逐伴哀猿長  
嘯以覓群寂寞兮中道迢遙兮前村一舉足兮顛越一  
回望兮迷昏且為歷崎嶇而上下縱呼籲兮難聞至其  
方幸出谷旋驚陟嶽羊腸迂迴龍門悠遠摩石蹬兮峻  
增俯谿谷兮危棧乍屈乍伸或仰或俛急賈勇之弗遑  
敢屏息而定喘李白所以興嗟於上天之難而何有於  
九折之坂是蓋帝眷王公險設重門一夫當關萬夫遂

巡疇有德而當興遂授此凌霄之城闔即在大禹䟽鑿  
八載四乘胼胝經營濬海亦不能假神聖之威靈俾岡  
巒之頓改維彼五丁其力伊何乃揮巨斧手劈嵯峨挾  
此移山平險之能若使之束甲而橫戈應無難取秦人  
之疆域而為蜀氏之山河區區石牛糞金有幾乃以開  
山勤勞壯士卒啟釁而招亂致隕滅其宗祀是固可為  
貪得者之炯戒而蜀人之愚諒不至此吁嗟乎財役身  
賤利令智昏古今同慨豈惟蜀人顧此關隘之危峻兮

宜乎人之停驂而迴輪奈何來往者之紛紛兮且如雨而如雲倘石牛在於今日兮或不惜遄征而宵奔安可以舉世之通病兮獨誚讓乎蜀人

嗚咽泉賦

葉映榴

綏州夾圓水大理而居文屏山屏其南循山而西為雕山故以雕陰名雕山之巔扶蘇塚在焉時有白虹出塚中去塚不五里有泉曰嗚咽相傳為扶蘇自裁處泉流斷續餘哀怨聲名之嗚咽甚稱己未夏余較士至綏公

事畢州守于君吳堡令李君邀余遊徘徊久之感慨係  
焉于李二君屬余記而賦之余應之曰唯唯憶昌黎有  
言凡物不得其平則鳴然鳴亦各異其或忠能折檻穎  
不處囊獨排羣議抗論朝堂其為鳴也激昂其或才人  
扼腕思婦關情青衫雨淚紅袖吞聲其為鳴也淒清又  
或權佞嫉才忠良去國憂讒畏譏吟騷賦鵬其為鳴也  
哀感又或俠客愁深孤軍援絕易水悲歌龍沙飲血其  
為鳴也悲切而茲泉不然如簷之溜如石之漚無瀑布

之可懸無珠簾之可織荷承露而乍傾雨將歇而猶滴水與石濡石為水蝕噫嘻此其所為嗚咽者歟聽之冷泠挹之榮榮若泣者之中哽如歌者之不勝欲鳴不可不鳴不能噫嘻此其所為嗚咽者歟方其初授軍麾含情未絕牽衣請留以止北轍於時可鳴也而不鳴泊乎祖龍已死姦臣矯符真偽未辨上章理誣於義可鳴也而不鳴即謂父不可違從容引決一言而死以殛讒孽於情可鳴也而不鳴而乃聞命銜悲撫劍飲泣引頸自

裁流血成碧鬼獻鵲啼風雲變色寫怨臆於清泉激哀  
音於白石閱萬古今千秋恍聞聲而於邑噫嘻此其所  
為嗚咽者歟乃為之歌曰雕山巖窠州城南岡巒森秀  
紛烟嵐吁嗟忠孝俱葬此公子扶蘓與蒙恬蒙恬墓道  
沙飛雪扶蘓塚旁泉嗚咽塚上長虹白亘天峽裏泉聲  
暗流血泣諫阮儒難悟君一麾北監長城軍沙丘片紙  
倉卒下掣劍呼天天不聞公子既死李斯裂子嬰誅高  
秦亦滅忠魂哀怨瀉鳴湍萬古悲腸猶百結泉流觸石

聲淙淙千巖萬壑吹陰風颯如寒雨滴梧葉惜如敗壁  
吟秋蛩碎佩叢鈴共悽切珠凌斷澗自摧折欲哭不哭  
時吞聲如與三十萬人訣我行聞此摧中腸長歌入雲  
思激昂棄絕父子蔑忠孝無道未有如始皇嗚呼阿房  
一炬清渭竭驪山銅泉泉亦洩牧童失火燒其陵惟有  
此泉流不絕

黃金峽賦

鄒溶

伊銀河之澄景映天漢之靈波托涓涓於嵒岨匯淼淼



於江沱趨東海而朝宗廣南國而興歌方其滄浪未遠  
漾水既同噓噏汚丙吐納褒龍姚墟之西壻河之東厥  
有天險鎖鑰漢中其地則武康雄鎮洋川故州玉符徵  
瑞珠臺環流控秦楚以扼塞据鄖襄之上游穆王却西  
征之轡赤帝紆東顧之憂典午設郡於本末拓跋置邑  
於巖頭山則脈連秦嶺勢接巴陵行迴磅礴霧蔚雲蒸  
駱谷逶迤子午杳冥萬螺疊翠千髻浮青水則支壑咸  
容細流罔拒馨椒艷桃柔蒲挺苧瀟淺潛深貫規溢矩

文川武谷之歸遜水，庶泉之聚羨，澈底之澄清，無纖毫之塵縷。夫何山勢促，水流湍，東斷瀨，瀉重灘，疑龍門闕，竦而斤削，恍虎牙傑峙而戟攢，詎藉丁開匪緣，靈擘啗共工之頭，觸詔應龍以尾，畫紺峯，截葉而摩霄，赭嶂，差我而礙日，懸崖鬬角而屏列，絕岸夾流而壁立，漏天光於一線，雲起還遮，星瀑布之千尋，烟來如織，亭午微射，曦暉夜分，畧窺蟾魄，雖盛伏而陰寒，縱晴明而晦黑，怒濤風鼓，雷不夏而常鳴，駭浪湯翻，雪非冬而恒積，遊女

心悸於葦航交甫魂銷而珮失客星犯斗驚回八月之  
槎仙令朝天梢度雙飛之鳥若乃蟠蘿糾木密箐叢芒  
藤有鈎吻纓絡竹有籊箭簣簞岩挂嶺松作濟川之舟  
楫秋蘭春蕙韞幽谷之芬芳靈禽構虛捷獸騰荒羣雌  
股接而飲澗孤狒唇翻而嘯岡色分魑魅角別麋麋豹  
濡霧以澤文麝護臍而憐香獺數月而肝益熊應時而  
膽藏鳧驚唳鵲鵲翔翔浮鷗鳴於沙渚喚驚鷗於山  
梁忘機狎其鷗鳥定偶羨夫駕鵞鷗鳩吉了應空谷之

清響鷓鴣杜宇叫落月而悲傷爾其奇鱗異甲潛錦昭  
妍揚鬢耀溜掉尾滉淵既乘波而奮翅亦吹浪而飛涎  
鼃驚帶於汭際鯉暴腮於垠前出丙穴而嘉美麗槎頭  
而肥鮮或順時而偶至或土產之自然復有胚璣孕璜  
含琛藏璞晶珀斂輝球琳未琢斑瑁元龜百朋雙珏皆  
希世之奇珍豈凡庸之能索惟是金河之水金水之砂  
注於碧澗養厥黃芽楊邁浮檀經淘汰而呈彩蔓苔麟  
趾由披揀而顯華百煉斯精銚鏐在鎔而成器一經煎

教鼎鉉叶吉以傳家故以黃金命名與麗水而同誇豈  
非婉雙南之珍重歷千古以休嘉也哉然而天下之險  
莫之與齊瓦林羊角大小高低曰籠曰甕獺措萬溪二  
十四灘九十餘里下如隕石上如升梯不辨南北難指  
東西屈曲駛逸自眩神迷假使澹臺問渡難不遇蛟而  
投壁縱令摩訶善沒曷敢探珠於睡驪第見馮夷蠲忿  
而亦威罔象懾嗔而猶勇石尤不惡而自阻封姨雖婉  
而仍猛天吳震盪以滔滔陽侯澎湃而洶洶誠可藐灩

瀕而傲瞿塘易人鮪而輕惶恐也矧夫雲根浸底不測  
其深石筍滿壑磴研成林似盆傾而盜注如鼎沸而瓴  
淋觸激迴瀾缺維欲絕盤渦迅漩羽芥都沉漁人生長  
於煙波過此收綸猶必逡巡而股栗商子往來於湖海  
抵茲停櫂不覺怔忡而戒心吾因思世路嶮巇俯鑒崇  
園之侈人情翻覆應懲况穴之淫君子奉椿護之遺體  
奈何侶蛟龍以相尋故寧居易而白璧慎毋行險於黃  
金

驪山賦

康乃心

瞻皇洲之漠漠兮經帝里之茫茫唯周秦之故苑兮繫  
唐漢之封疆何嶢岈之綿亘兮橫豐鎬以回翔拍青青  
其似黛兮石砢砢而如霜潁清渭之東流兮約澹灞其  
西行固祖龍之壽域兮伊文帝之崇岡應星躔於井鬼  
兮鎮岐雍於金皇當山河之兩戒兮通雲漢於天章昔  
驪戎之所據兮實晉獻之攸荒羌烽火之作戲兮俾宗  
周以喪亡豈層巒之秀麗兮偏遊冶以為臧抑列雍於

上國兮或亦都人高士之所彷徨爾其連峰斷嶺暮雨  
朝烟層崖疊嶂花馥草芊岑名金斧水出溫泉風鳴林  
錯鳥語石妍平眎長樂之苑遠臨杜曲之川左龍首以  
還顧右挑塞之當前既可觴而可詠亦宜隱而宜仙將  
褰裳乎竟日欲策杖而流連探遺跡於神母訪疑義於  
李筌冀握機其可授識木火之真傳極遊目於遐表採  
靈芝於絕巔何崆峒之浩渺無軒帝之長年已而赤日  
將微夕陽欲下搔首中天悲生四野感倩艷兮岩阿寄



興亡於頃雅歛零淚兮沾衣或浩歌而盈把睇眴嶺之  
牛羊愴九變之鐵馬嗟百戰兮為雄不侮鰥而凌寡胡  
諸孫兮繼起乃莫庇夫廟社既龍飛於興慶復燕啄乎  
華清醉朝陽之第一或並輦而同行陟朝元之高閣顧  
繡嶺而縱橫浴鴛鴦於別殿訂牛女之私盟慨人天之  
會合時泣下夫長生矧其紅塵一騎驚荔子之飛來綠  
樹重簷怪雪花之未落縹緲驪宮兮遙聞仙樂蒼茫豐  
市兮近見行人悵曲江其已去開偃月之方新固將經

時經歲以夕以朝宴瑤池而永好逢羣玉以久要妃子  
海棠歡齊乎金母三郎玉笛壽比夫王喬孰知恩波方  
承乎太液戎馬忽動於燕山催花羯鼓淵淵坎坎兮捷  
開劍閣霓裳羽衣翩翩裊裊兮舞破潼關天半峨眉鳳  
輦之匆匆方下雲中紫閣鸞車之噦噦不還霜殿紅妝  
兮長辭金鏡馬嵬青草兮遂葬玉環慘石甕於殘陽咽  
湯泉之半灣野草淒迷以長綠宮花寂寞而無顏遡開  
寶之理亂知帝位之維艱苟慎終其如始奚難辨乎忠

姦豈茲山兮亡國實不戒夫冥頑徒叩頭兮泣諫空流  
恨以潺湲步林椒兮太息每惆悵夫雲鬢聊上下兮千  
古託規諷於行間亂曰於戲哉雄連兩華壯坤輿兮秀  
接終南麗簾居兮吐納風雲元始墟兮祈靈太乙授鴻  
書兮烽臺繡嶺禾黍餘兮周道唐宮怨樵漁兮億萬斯  
年御世膺圖夕陽流水顧此嵯峨尚取鑑於古初兮

陝西通志卷八十九